

Hebreos

Cohamacu macuno to Pucurore yahubasaha masare

1 Panopu Cohamacu payu tahari mari coyeare panopu macaina cjirire to yare yahua tiri jire. Payu to beserina to yare yahu turiaa tiri jire. To yare yahu mughtaina cjirire yahu dutiro, ã yahua tiri jire tiro mari coyeare. **2** Mipure pihtiri dacho panocã jia dachorire to macunore to yare to yahu dutichu tiro sehe marine yahua tire. Tiro to Pucuro to yoa dutiro mehne ahri yahpare, mmano cũhure yoariro jira. To Pucuro sehe pihtiri dacho panocã jipihtiare cjuhtirore cãa tiri jire tirore. **3** ã jiro to macuno sehe to Pucuro si siteare cjuariro jiro, cũno potori to Pucuro yoaro seheta jiro, to Pucuro to jia tiare marine ñona. ã yoa to macuno to tuaa mehne to dutichu ahri yahpa, mmano cũhu ã jirucura. ã yoa mari ñano yoari buhirire to cosari baharo mnanopu to Pucuro tua yũhdũariro potu bũhũsehei dujiri jire tiro, to pũthoro jiare ñono.

Cohamacu macuno anjoa bui jira

4 Tiro Cohamacu macuno wama tira. Tí wamare cũri jire Cohamacu tirore. ã wama tiro paina bui pũthoro jira. ã jiro tiro anjoa yũhdoro tua yũhdũũcariro jira. **5** To yaina anjoa sehere Cohamacu ne õ sehe ni yahuerari jire:

“Yũ macu jira mũhũ.

Michare yũ macu mũ jiare masichũ yoaihca”, niri jire Cohamacu to macunore. Anjoa sehere ne õ sehe ni yahuerari jire. Tinare ahri cũhure ne yahuerari jire:

“To pucuro jija yũhũ.

ã yoa tiro yũ macu jira”,

niri jire Cohamacu to macunore. Anjoa sehere ne õ sehe ni yahuerari jire. (ã jiro to macuno tina yũhdoro tua yũhdũũcariro jira.) **6** Pa tehe to macunore wahma masa bajuarirore ahri yahpai cũno õ sehe niri jire Cohamacu tirore:

“Jipihtina yũ yaina anjoa na tuhcuca caha sũ,
ñõ payoahca tina yũ macure”,

niri jire tiro. ⁷ Ñ yoa to yaina anjoa sehere yahuro taro ò sehe niri jire tiro:

“Y^u yaina anjoare wihnono yoaro sehe pjac^u tich^u yoaja y^uh^u.

Tina y^uh^ure dahra cohtaina jira.

Tinare pichaca yoaro sehe pjac^u tich^u yoaja y^uh^u”,
ni yahuri jire Cohamac^u. ⁸ Tinare ã niparota to mac^uno sehere ò sehe niri jire:

“M^uh^u Cohamac^u jipihtina bui p^uhtoro ã jirucuihca. Quihõno dutiuhca m^uh^u m^u yainare.

⁹ Mahñono marieno yoaare, noano yoaare tuaro cahmana m^uh^u.

Ñ jic^u ñaa yoaare ñ^u yabira m^uh^u.

M^u ã jiro jich^u ñ^uc^u y^uh^u m^u P^uc^u jipihtina paina y^uh^uoro m^uh^ure wahchech^u yoahi”,

niri jire Cohamac^u to mac^uno. ¹⁰ Ahri c^uh^ure niri jire tiro to mac^uno “P^uhtoro”, ni pisuro:

“P^uhtoro, wahmanop^ure ahri yahpare, m^uano c^uh^ure bajuamehnere m^uh^u m^u basi.

¹¹ Tí jipihtia cohtota pihtia wahaahca.

M^uh^u sehe ne cohtotasi.

Ñ jirucuihca m^uh^u.

Tí jipihtia suhtiro to baa boraro seheta pihtia wahaahca.

¹² Tí jipihtia m^uanore ahri yahpa c^uh^ure cohtotach^u yoaihca m^uh^u.

M^unano suhtirore m^u cohãboro seheta tí jipihtiare cohtotach^u yoaihca m^uh^u.

Suhtirore tjuwe na m^u cohtotaro seheta tí jipihtia cohtotaahca.

M^uh^u sehe ne cohtotasi.

Ñ jirucuihca m^uh^u”,

niri jire Cohamac^u to mac^uno. ¹³ Ne anjoa sehere ahrire yahuerari jire Cohamac^u:

“Y^u poto b^uh^usehei dujiga m^uh^u.

P^uhtoro jira m^uh^u.

Ñ jic^u m^uh^ure ñ^u tuhtiinare doca dahre, y^uh^uru^ucabasaihtja.

Tina bui p^uhtoro jiihca m^uh^u”,

niri jire Cohamacu to macunore. ¹⁴ Jipihtina anjoa sehe Cohamacure dahra cohtaina jira. Ñ jiro Cohamacu warocara tinare to yaina anjoare Cristo to yuhdũchũ yoahtinare yoadoho dutiro.

**Cohamacu yare noaa buheare marine
ã tũhotunocano cahmaerara**

2 ¹ Ñ yoa Cohamacu macuno waro marine yahuriro to jichũ masina to yahuare mari tũhorire noano wacũno cahmana marine, “Tĩre bori”, nina. ² Anjoa masare Cohamacu dutia cjrĩre ti yahu cũ turiariro seheta tí dutiare yuhdũũca dutierari jire. Ñ jia masa sehe anjoa ti yahurire ti yuhdũũcachũ ñũno Cohamacu tinare quihũno buhiri dahreri jire. ³ Anjoa ti yahurire mari yũhtiri yũhoro Cristo sehene yũhtiro cahmana. Tiro mari pũhtoro marine to yuhdũchũ yoahore yahu mũhtari jire. Ñ jia tirore tũhorina sehe to yahurire marine yahu turiare marine noano masichũ yoaa taa. Ñ jiro tí buheare marine to yuhdũchũ yoahiti buheare mari ã tũhotunocachũ Cohamacu tuaro marine buhiri dahrerohca. Tĩre duhti masieraja mari. ⁴ Tí buheare tũho mũhtaina painare ti buhero watoi Cohamacu sehe tí buhea quihũnota ti jichũ ñono nire. To tuaa mehne ñono nire. Ñ yoa payũ tahari to tuaa mehne yoa ñono, tí buheare quihũno ti jichũ ñono nire. Ñ yoaro to yainare ti yoahire to cahmano seheta cũri jire to buhea quihũno ti jiare ti masihti. Espĩritu Santo sehe jira marine ã yoa masichũ yoariro.

Jesucristo mari yoaro seheta pjacu tiriro masa bajuaha

⁵ Pihitiri dacho baharoi jiina Cohamacu cahai jiina michapucacã yũ yahurina cjiri bui pũhtoa jisi anjoa sehe. Tina anjoare pũhtoa sõi Cohamacu. ⁶ Wiho mejeta cũiro Cohamacure to durucurire õ sehe ni joari jire panopũ:

“Masa wiho jiina ti jipachũta tinare wacũna mũhũ.

Masare noano yoara mũhũ.

⁷ Mahaã nãmũricã anjoa docai masare cũri jire mũhũ.

Ñ cũpacũta mipũre tinare tuaare wacu pũhtoa sõi
jire mũhũ.

⁸ Mũ ã sũchũ ahri yahpa macaa bui jipihtia bui
jira masa”,

niri jire panopũ macariro Cohamacure. Ñ cũno ahri yahpa macaina wahiquina jipihtina bui, jipihtia bui cũri jire Cohamacu.

Masare to ã pũthoa sũpachũta jipihtina ahri yahpa macaina, ahri yahpa macaa bui jierasínica masa. ⁹ Ñ tina bui jierasínipanahta, Jesu sehere masija mari. Mahaa nũmũricã anjoa docai Cohamacũ to macũno cũhũre cũri jire, mari yaro jiborirore yariahtirore. Cohamacũ marine cahĩno Jesure mari yariaborirore to yariachũ cahmari jire. Ñ jiro to ã yariachũ ñũno tirore tuaare waro, pũhtoro sũri jire tirore.

¹⁰ Cohamacũ jipihtiare bajuamehneriro jira. Ñ yoa jipihtia to ya dihta jira. Ñ jiro Jesure to yaria dutichũ, tiro sehe mari ñaa yoari buhirire cohãri jire. Ñ cohãri jire tiro masa payũ to yaina jihtinare mũanopũ naano taro. Jesu to ñano yũhdũchũ masare yũhdũchũ yoah tiro Cohamacũ to waha dutiro seheta yoaro niri jire tirore. To ã yoachũ pinihta noa nina. Ñ jiro Jesu sehe marine yũhdũchũ yoariro waro, mari pũhtorota jira.

¹¹ Jipihtina masare ti ñaa yoari buhirire Jesu, to cosawerina mehne pũcũ tira Cohamacũre. Ñ jiro mari Pũcũ cũirota jira. Mari Pũcũ to jichũ Jesu marine to yainare to cosawerinare “Yũ coyea jira”, ni pisuro ne bũo tierara. To ã ni pisurire mũsare yahuihtja. ¹² Õ sehe nino niri jire tiro:

“Cohamacũ, mũ jia tiare yahuihtja yũ coyeapũre.

Jipihtina yũ yaina panoi mũhũre ño payocũ ‘Tuariro jira’, ni yahuihtja yũhũ tinare”,

niri jire tiro to Pũcũrore. ¹³ Ahri cũhũre niri jire tiro:

“Cohamacũre wacũ tuaihca yũhũ”,

niri jire tiro. Ahri cũhũre niri jire tiro:

“ Õi jija yũhũ.

Cohamacũ pohna mehne õi jija.

Yũhũre to cũrina yũ coyea mehne õi jija’, niri jire tiro to yainare ‘Yũ coyea’ ”,

ni pisuro.

¹⁴ “Cohamacũ pohna”, to niina pjacũ tiina mari jichũ ñũno, Jesu sehe mari ya pjacũ yoaro sehe jiriro tari jire. Ñ jiriro tari jire tiro crusapũ yariaro taro, watĩnore butichũ yoaro taro. Tiro watĩno sehe yariachũ yoariro jira. ¹⁵ Ñ yoa watĩnore butichũ yoaro, marine yũhdũchũ yoare. Mari sehe dachoripe mari yariahtore cuimai. Ñ cuiina jina pichacapũ wahaborina jimai mari. Ñ jiina mari jichũ ñũno tiro marine yũhdũchũ yoare. ¹⁶ Ñ yũhdũchũ yoaro anjoa sehere yoadohoro taerari jire tiro. Abrahã panamanare Cohamacũ yainare mari sehere yoadohoro tari jire. ¹⁷ Ñ taro tiro mari coyeiro warota tari jire.

Cũno potori mari yoaro sehe pjacũ tiriõ tari jire. Ã taro mari yũhdũhtire mari ñaa yoari buhirire Cohamacũre cohã dutiro taro niri jire. Ã yoaro mari sacerdotea pũhtoa bui pũhtoro to yoariro sehe yoaro taro niri jire. Mari yoaro sehe jiro marine noano pja ñũna. Ã yoa marine noano yoadohora. Ã jiro tiro mari sacerdotea pũhtoa ti bui pũhtoro jiro nina Cohamacũre dahra cohtariro jiro. ¹⁸ Tiro ñano yũhdũri jire. Ã jiro watĩno tireõ ñano yoa dutimari jire. Yoaerari jire tiro. Ã ñaare yoaerariro jiro, tiro sehe mari cũhũre ñaare yoaerachũ yoa masina. Watĩno to ñaare to yoa dutichũ ñũno marine ñaare yoaerachũ yoa masina Jesu.

Jesu Moise cjiro bui jiriõ jira

3 ¹ Jesu to ã jiriõ jichũ ñũna tireõ noano wacũga mũsa. Yũ coyeya Jesu yaina, Cohamacũ to beseina jira mũsa. Tiro Jesu sehe Cohamacũ to warocariro jiro mari sacerdotea pũhtoa ti bui pũhtoro jira. To buheare noaa buheare mari quihõno tũho, buheja. Tiro sehe Cohamacũ warocariro, mari sacerdotea bui pũhtoro to jia tiare noano wacũga mũsa. ² Cohamacũ tireõ marine to yũhdũchũ yoahtore to cũchũ tiro sehe to cũriõ sehetã yoari jire. Ne yũhdũrũcaerari jire. Moise cjiro cũhũ Cohamacũ yaina Israe masare yoadohoro ne yũhdũrũcaerari jire. Ãta yoari jire Jesu cũhũ. ³ Moise cjiõre ti ño payoriõ yũhdoro Jesu sehere ño payoro cahmana marine. Õ sehe jira tí mari piti dahre buhechũ: Wũhũre mari ño payoriõ yũhdoro wũhũ dahreriro sehere ño payoro cahmana marine. Ã jiro Jesu sehe wũhũ dahreriro yoaro sehe jiriõ to jichũ Moise cjiõre mari ño payoriõ yũhdoro tiro sehere ño payoro cahmana marine. ⁴⁻⁶ Õ sehe jira ti: Mari Cristo yaina Cohamacũ ya curua macaina jija. Cristo sehe wũhũre to cũboriõ sehetã marine to ya curua macaina cjihtire cũno nina. Masa sehe wũhũse yoaina jira. Cohamacũ sehe jipihtiare yoariro jira. Moise cjiõre sehe Cohamacũ ya curua macainare yoadohorucuriõ jiro, baharopũ Cohamacũ to yahuhtore yahua tiriõ jire masare. Cristo sehe Cohamacũ macũno jiro, Cohamacũ yare yoarucuriõ jiro, Cohamacũ ya curua macaina bui pũhtoro jira. To ã jiriõ jichũ ñũna Moise cjiõre mari ño payoriõ yũhdoro Cristo sehere ño payoro cahmana marine. Ã jina mari sehe Cristore wacũ tua duhuerana, marine to yũhdũchũ yoahtore ã wahcherucuna to ya curua macaina jija mari.

Cohamacu to yainare tiro mehne ti noano sochu cahmana

7 Ñ jina Cristore mari wacũ tua duhuerahstore ò sehe yoaro cahmana marine. Ò sehe nina Espíritu Santo:

“Michare yũhũ Cohamacu m̄sare yũ yahuchũ,
yũhti duaeraina jiena tjiga.

8 Noano yũhtiga m̄sa yũhũre.

Ρανορũ Israe masa masa marienορũ jia,
ãta yũhdũrũcarucure yũhũre.

Ñ jina tina yoaro sehe yoarena tjiga m̄sa yũhũre.

9 Τόρũre cuarenta cũh̄mari waro tinare yũ tuaa
mehne yoa ñomai.

Yũ ã yoa ñopachũta tina sehe ò sehe ni tũhotua
timare: ‘¿Ñãare mari yoachũ ñũno Cohamacu
marine buhiri dahrebocari?’ ni tũhotua timare.

Ñ ni tũhotua ñano yoa ñũa tire.

10 Tĩ ã yoachũ ñũcũ tina mehne suai.

Ñ suacũ ò sehe nii: ‘Tina yũ durucuarẽ tũho
duaeraa, soro jia buheare ã wacũmacarucua
nina.

Ya sehere ne yũhti duaerara’, nii tinare.

11 Ñ jicũ tina mehne suacũ ò sehe ni yahui: ‘Tina yũhũ
mehne macaina ne jisi.

Ñ jia warũ tiro marieno jisi tina’, ni yahuri jire
Cohamacu”,

niri jire Espíritu Santo sehe.

12 Ñ jina yũ coyẽa, noano yoaga m̄sa, “Cohamacũre
cohãri”, nina. M̄sa ñãare tũhotuna, Cohamacũre catirirore
wacũ tuaerana, tirore cohãboca m̄sa. Ne cãiro m̄sa mehne
macariro ã yoaero tjiaro. 13 Ñ jina ahri sehere yoaro cahmana
m̄sare: M̄sa mehne macainare dachoripe Cohamacu yare
m̄sa basi cahma durucuga “Ñãare yoari”, nina. Ñãare yoana,
“Tĩ mehne wahcheja” nina, mahũoare tũhotuna nija mari.
Ñ ni tũhotuena tjiga. Ñãare yoarucuna Cohamacu ya sehere ji
coeraja mari. Ñ yoana ñãare duhu duaeraja. “Ñ yoari” nina,
m̄sa mehne macainare Cohamacu yare m̄sa basi cahma
durucuga. Cristo to tahto pano dachoripe tíre ã cahma
durucurucuga. 14 Wahmanore Cristore mari wacũ tua dũcariro
seheta tó seheta mari wacũ tuarucuna, mari catiro puro to
yare duhuerana, tiro mehne macaina jija.

15 Õ sehe nina Cohamacu yare ti joari pui:

“Michare yuhu Cohamacu musare yu dutichu noano yuhtiga musa yuhure.

Panopu macaina Israe masa yu yahupachuta ño payo duaeraa, yuhure yuhti duaerare.

Ã jina tina yoaro sehe yoaena tjiga musa, niri jire Cohamacu”,

ni joaa tiri jire panopure. 16 Ã yoa Cohamacu to yahurire tuhomarina jipahta tina tirore yuhtierari jire. Tina jipihtina Egiptopu jiina Moise to na wiorina jipahta tirore ne yuhtierari jire. 17 Ã jia ã ñano yoarucua, cuarenta cuhmari waro Cohamacure suachu yoa mujaa tiri jire. Ti ã yoari buhiri masa marienopu yariari jire tina. 18 Tirore ti ã yuhti duaerachu ñuno õ sehe cua pisaro mehne niri jire tiro: “Tina yuhu mehne macaina ne jisi. Ã jia wapu tiro marieno ne jisi tina”, niri jire tiro. 19 To ã nichu tuhona ahri sehere masinahca mari: Tina Cohamacure ti wacu tuaerari buhiri tiro mehne macaina ji masierari jire. Ã jia tiro mehne noano so masierari jire.

4 1 Ã jiro panopu macainare tiro mehne ti noano sohtore cahmano, tinare “Yuhu mehne wapu tiro marieno sonahca”, ni cûri jire Cohamacu. Mari cûhure ãta ni cûri jire tiro. Ã jina cuaro mehne Cohamacure yuhdurucaena tjijihna mari, “Cohamacu yare yoa moñori”, nina. Ã yoa moñona tiro mehne noano sosi mari. 2 Panopu macaina cjiri Cohamacu yare ti tuhoriro seheta mari cûhu noaa buheare tuhohi. Tina tuho mûhtaina cjiri sehe tuhoa, “Cohamacu ya waro jira”, ni tuhotuerari jire. Ã jia ti tuhori cjiri yaba cjihti jierari jire. 3 Mari sehe tirore wacu tuana Cohamacu mehne macaina jija. Ã jina tiro mehne noano jinocahna, tiro mehne sonahca. Wapu tiro marieno jinahca. Cohamacu to niriro seheta jira tí. Õ sehe niri jire tiro tirore yuhtieraina cjirire:

“Tina mehne suacu cuaro mehne õ sehe ni yahui:

“Tina yuhu mehne macaina ne jisi.

Ã jia wapu tiro marieno ne jisi’, ni yahui”,

niri jire Cohamacu yare ti joari pui. Ahri yahpare to yoari baharo dahra duhusiniri jire tiro. Yoari pja dahra duhuparota tina sehere tiro mehne so dutierari jire tiro. 4 Ahrire mari masija. Seis dachori ahri yahpare to yoari baharo to dahra duhurire yahuro õ sehe niri jire Cohamacu ya durucuaere ti joari pui:

“Seis dachori baharo jipilhtiare to dahraare pahñoño,
Cohamacu dahra duhuri jire”,
niri jire to yare ti joari pui. ⁵ Ñ yoa pari turi Cohamacu yare ti
joari pui ñ sehe ni yahura tiro mehne noano jierainare:

“Tina yuhu mehne macaina ne jisi.

Ñ jia wapu tiro marieno ne jisi, niri jire Cohamacu”,
nina to yare ti joari pui. ⁶ Noaa buheare tuho muhtaina tirore
ti yuhdurucari buhiri tiro mehne macaina jisi tina. Ñ jia tiro
mehne wapu tiro marieno jisi tina. Paina sehe tiro mehne
macaina jahca. Ñ jia tiro mehne wapu tiro marieno soina
jahca. ⁷ Ñ jiro masare to yuhduchu yoahiti dachori paye
dachorire cüri jire pari turi Cohamacu. Tí dachorita mipure
jira. Payu cühmari baharo Israe masa cjiri Cohamacure ti
tuho muhtari baharo tí dachorire yahuri jire Davi cjiro sehe.
Cohamacu tirore to yahu dutichu yahuri jire tiro. Cohamacu
ya durucua ti joarire musare yu yahua dachorire ñ sehe ni
joari jire Davi cjiro:

“Ahri dachorire yuhu Cohamacu musare yu
yahuchu yuhdurucaro marieno noano
yuhitiga masa yuhure”,

ni joari jire panopure. ⁸ Tí pjarure Josué cjiro Israe masare
Cohamacu to wari yahpai na suri jire. “Yuhu mehne wapu tiro
marieno soina jahca” nino, tí yahpai ti sohtore nino nierari
jire Cohamacu. Tí yahpai so dutiro, paye dachori to yuhduchu
yoahiti dachorire cüeraboa tiro. ⁹ Wiho mejeta seis dachori
baharo ahri yahpare to yoari baharo Cohamacu to dahra
duhuriro seheta mari to yaina cühu tiro mehne wapu tiro
marieno mari sohto jirohca. Tiro mehne mari noano jihto
jirohca. ¹⁰ Cohamacu sehe to dahrarire duhunocasiniri jire.
Tó seheta tiro mehne soina cühu mari wapu tirire
duhunocanahca. ¹¹ Ñ jina mari to yaina noano yoajihna.
Cohamacu yare noano yuhitijihna tiro mehne mari noano
sohto sehe. Panopu macaina mari coyea cjiri ti yuhdurucari
baharo Cohamacu mehne macaina ji masierari jire tina.
Tina yoaro sehe yoaena tjijihna mari.

¹² Cohamacu ya durucua marine catichu yoara. Noaa
sehene marine cohtotachu yoara. Ñ jia to ya durucua wiho
jia jierara. Ñ yoa ñosari pji pu bühuseheri siori pji mehne
dihirore ti yihso ñu ti masiriro seheta to ya durucua cühu
mari jia tiare noano masichu yoara. To durucua mari

tũhochũ, tíre mari buhechũ mari jia tiare, mari tũhotua cũhũre noano masi pahñochũ yoara marine. **13** Ne Cohamacũre mari jia tiare mari dohse yoarire nũo masieraja mari. Jipihtiare to bajuamehnerire, to bajuamehnerina cũhũre ñũna tiro. ã Jina mari yoarire tirore yahu yũhdũro cahmana marine.

Jesu tuariro mari sacerdotea pũhtoa bui pũhtoro jira

14 Jesu Cohamacũ macũno to Pũcũro cahapũ tjuariro jira. Tiro tuariro mari sacerdotea pũhtoa bui pũhtoro jira. ã jiro marine Cohamacũre sini payora. To ã jiriro jichũ ñũna mari sehe to yare noano yũhtijihna. Tirore noano wacũ tuarucujihna. **15** Tiro mari sacerdotea pũhtoa bui pũhtoro mari ñano yũhdũchũ ñũno noano pja ñũriro jira. Mari ñaa goa pjaare masina tiro. Watĩno jipihtiare ñaare marine to yoa dutiriro seheta tiro cũhũre ñaare yoa dutimari jire. To ã yoa dutipachũta tiro ñaare yoaerari jire. ã ñaare to yoa dutimariro jiro, marine pja ñũno tiro yoadoho masina marine. **16** ã Jina cuiro marieno Cohamacũre sinijihna. Tiro marine cahĩna. ã jiro tirore mari sinichũ tiro sehe pja ñũno, marine yoadohorohca. Watĩno marine to ñaare yoa dutichũ, mari ñano yũhdũchũ cũhũre tiro marine yoadohorohca.

5 ¹ Sacerdotea pũhtoa bui pũhtoro besero, masũnore besera Cohamacũ. ã to beseriro jiro sacerdotea pũhtoa bui pũhtoro sehe tiro mehne macainare yoadohoro taro, Cohamacũre dahra cohtariro jira. ã jiro ti ñaare ti yoari buhiri Cohamacũre sinibasara tiro mehne macainare. Wahiquirore wajã jũ mũono, Cohamacũre sinibasara. ² Sacerdotea pũhtoa bui pũhtoro paina masa yoaro sehe noano masi pahñoerariro jira. ã masi pahñoerariro jiro paina masierainare yoadoho masina. ã jiro noano yoaeraina cũhũre noano yoadoho masina. ³ ã Jia sacerdotea noano yoa pahñoeraina jia ñaa buhiri tiina jira tina cũhũ. ã Jia ti basi ti ñaare ti yoari buhiri wahiquirore wajã jũ mũo, Cohamacũre sinina. Paina masare yoadohoa taa, ti ñaa buhiri ti sinibasariro seheta ti basi ti ñaa buhiri cũhũre sinina Cohamacũre.

⁴ To basi to mũ sũro sacerdotea pũhtoa bui pũhtoro sãaerara. Cohamacũ sehe tirore besero, sacerdotea pũhtoa bui pũhtoro sũna. Panopũ macariro Aarõ cjirore to cũriro seheta paina sacerdotea pũhtoa bui pũhtoro cũhũre cũna tiro. ⁵ Tó seheta Cristo cũhũ to basi to mũ sũro sacerdotea pũhtoa bui

pũhtoro sãaerari jire. Cohamacũ sehe tirore pũhto sũno, õ sehe niri jire:

“Yũ macũ jira mũhũ.

Michare yũ macũ mũ jiare masichũ yoaihca”, niri jire Cohamacũ. ⁶ Pa tehe õ sehe niri jire Cohamacũ Cristore:

“Jipihtia dachoripe sacerdote jirucuihca mũhũ.

Melquisede to jiro sehetã sacerdote jirucuihca mũhũ”,

niri jire to macũnore. ⁷ Cristo ahri yahpai jiro saũurucua mehne, yahco mehne Cohamacũre tuaro siniri jire tiro “Yũhũre masoga”, nino. Cohamacũ sehe tirore yariare maso masiriro jira. To ã sinichũ Cohamacũ tũhori jire tirore. Cohamacũ cahmaa dihtare to yoachũ ñũno Cohamacũ sehe to sinirire tũhoro, tirore yũhtiri jire. ⁸ Cristo Cohamacũ macũno jiparota ñano yũhdũri jire tiro. ã ñano yũhdũro yũhtiri jire Cohamacũre. ã yũhtiro noano yũhtiare masiri jire. ⁹ ã ñano yũhdũro, crusapũ yariaro jipihtina tirore yũhtihtinare yũhdũchũ yoahitiro wahari jire. ¹⁰ ã jiro Cohamacũ sehe tirore sacerdotẽa pũhtoa bui pũhtoro cũri jire. ã jiro Melquisede sacerdotẽa pũhtoro to jiro sehetã jira Cristo.

Cristo yaina tirore wacũ tua duhuchũ cua nina

¹¹ Payũ õ sehe jiare mũsare yahu namo duaja sã. Sã ã yahu namo duapachũta mũsa sehe dapu bũtiina jira. ã jina mũsare sã yahuchũ mijo nina sãre. ¹² Yoari pja Cristo yaina jimana mũsa. ã jina mipũre painare buheinapũ ji tuhsũboa mũsa. Mũsa ã jinarũ jiborina jipachũta paina mũsa sehere buheahca tjoa. Cohamacũ yare mijoera curea buhea dihtare tũhora mũsa. Wihãinacã pẽcho dihtare ti sihni masino sehetã mũsa cũhũ mijoera curea dihtare noano tũhora. Wahma buhe dũcaina yoaro sehe jira mũsa. ¹³ Pẽcho sihniina wihãinacã jisina. Tina yoaro sehetã mũsa cũhũ jira mijo cureare tũhoerana. “Ahri ñaa jira. Ahri noaa jira”, ni bese masierara mũsa. ¹⁴ Chũare chũina sehe bũcũna jira. Tina yoaro sehe jiina noano tũho masiina noano buheina jira. “Ahri ñaa jira. Ahri noaa jira”, ni bese masina tina sehe.

6 ¹⁻² ã jina Cohamacũ yare noano masiina, noano yũhtiina jijihna. Cristo yare wahmanore mari buhe dũcana õ sehe masi dũcai: Mari mũ sũro mari yoaa yaba cjihti jierara. Mari

noano yoaa mehne yũhdũsi mari. Cohamacũre wacũ tuaro cahmana marine. Ahrire wahmanopũre buhe dũcare marine. ã Jia bautisaare, wamomacarire marine ti duhu payoare, yariaina ti masa mũjaare, ahri dacho to pihtiri baharo Cohamacũ to buhiri dahrehtore, to buhiri dahrehtina ti ñano yũhdũrucuhto cũhũre ahri cũhũre wahmanopũre marine buhe dũcare. Õ sehe jia buheare masi tuhsũ, paye sehere noano buhe namojihna tjoa. ³ ã Jina Cohamacũ to cahmachũ ãta yoanahca mari.

⁴ Mari ã yoaerana Cohamacũ yare duhuboca mari. Cohamacũ yare masiina jipahta tíre duhuinare ne pari turi pano ti ñaa tũhotumarire cohtotachũ yoa masierara. Tó sehe jiina Cohamacũ tinare to noano yoahore masia, Espíritu Santo to yoaa tiare mahanocã masimare. ⁵ ã yoa Cohamacũ ya durucuare tũhoa noaa durucua ti jichũ masimare. Tuhsũ, pihtiri dacho baharopũ Cohamacũ to tuaa mehne mari ã jirucultore, masare to buhiri dahrehto cũhũre tina masimare. ⁶ ã jiiaparũre Cristo yare duhurinare pari turi ti ñaa tũhotumarire tinare cohtotachũ yoa masierara. Tó sehe yoaina Cohamacũ macũnore pari turi crusapũ ti cjã puharo seheta tirore yoaa nina. Ti ã yoachũ ñaa paina masa Cristore bũjũpera. Ti ã yoachũ tinare ti ñaa tũhotumarire tinare cohtotachũ yoa masierara. ⁷ Õ sehe jira tí mari piti dahre buhechũ: Noari yahpare pjíro coro tachũ tí toaa noano du, dicha tira. ã jiro tí wese pũro dichare cjũara to chũhtire. Tí yahpa Cohamacũ noano to yoari yahpa jira. (Tó seheta noano yoara tiro to yaina cũhũre.) ⁸ Wiho mejeta agã pota mehne, tja mehne tí yahpa diaro yaba cjihti jierara. ã jiri yahpa Cohamacũ to jũ cohãhti yahpa jira. ã jiro tí yahpare jũnocanohca. (Tó seheta yoara tiro tirore duhuinare.)

Cristore ã ño payorucuinare yũhdũchũ yoara Cohamacũ

⁹ Yũ cahĩina, mũsare ã ni yahupaihta mũsa sehere “Cristore duhuina jira”, nii nieraja. Mũsa sehe Cristo to yũhdũchũ yoaina jira. ã Jina noare yoana nica mũsa. Tíre masija yũhũ. ¹⁰ Noano mari yoari wapa quihõno marine noano yoariro jira Cohamacũ. ã jiro to yare mũsa tuaro dahrari wapare bosí tiro. Tirore cahĩna noano yoadohore mũsa tirore. Paina Cristo yaina cũhũre yoadohore mũsa. ã yoa tinare yoadohosinina nica mũsa. ã yoaina mũsa jichũ ñũno bosí tiro. ¹¹ Mũsa catisinino puro painare mũsa cahĩrucuchũ, mũsa yoadohorucuchũ

cũhũre cahmaja sã, baharopũ Cohamacũ yare mũsa duhuri nina. Mũsa ã noano yoachũ ñũno noano yoarohca Cohamacũ mũsare. **12** ã jina mũsa cara bujũina mũsa jichũ cahmaeraja sã. Paina Cristo yaina ñano yũhdũpahta to yare ne duhuerara. Ti ã yoachũ ñũno Cohamacũ “Mũsare waihtja”, to nirire tinare wa pahñonohca. ã jina mũsa cũhũ tina yoaro seheta yoarucuga.

13-14 Panopũ Cohamacũ Abrahã cjirore õ sehe ni cũa tiri jire: “Yũ wama mehne ahrire potocã nii nija mũhũre. Mũhũre noano yoaihtja. ã yoacũ mũ panamana ji turiainarũre payũ masa jichũ yoaihtja”, ni yahu cũa tiri jire Cohamacũ Abrahã cjirore. ã ni yahu cũno to ya wama mehne ã ni yahuro niri jire. Pairo tiro bui jiriro ne mariachũ to ya wama mehne to basita ã ni yahua tiri jire. **15** “Mũhũre noano yoaihtja”, Cohamacũ to ni cũrire Abrahã cjiro sehere noano to cohtachũ ñũno to niriro seheta tirore noano yoaa tiri jire. **16** “Cohamacũ mehne potocã nina nija”, masa sehe nia, tina ti bui jiriro wama mehne ã ni yahua nina. “Cohamacũ mehne potocã nii nija”, cũiro to nichũ tũhoro tiro pairo mehne cahma sayoriro “Potocã tjira”, ninohca. ã jia cahma sayo duhuhca tina. **17** Cohamacũ Abrahãre “Mũhũre noano yoaihtja”, ni cũno to ya wama mehne ã ni yahua tiri jire. To ã ni yahurire tũhona “Potocã tjira tí. ã yoa to niri ne cohtotasi” ni, masija mari. Tĩre mari masihto sehe to ni cũri mehne “Yũ wama mehne potocã nii nija”, ni yahua tiri jire Cohamacũ. **18** ã jiro pũaro to ni durucuri mehne potocãta to nirire masichũ yoari jire Cohamacũ marine: To ni cũri cũhũ “Yũ wama mehne potocã nii nija”, to ni yahuri cũhũ tí pũaro mehne to ni durucurire yahua tiri jire tiro. To ni cũri cũhũ, “Yũ wama mehne potocã nii nija”, to ni yahuri cũhũ ne cohtotaerara. Cohamacũ ne mahñoerara. To ã jiriro jichũ masina, marine to yoadohohtore macana, tirore noano wacũ tuana, wahchea mehne marine to yũhdũchũ yoahore cohtanahca mari. **19-20** ã to yũhdũchũ yoahore cohtana, wacũ tuaina jija mari. ã jina cuieraja. Sacerdotea pũthoa bui pũhtoro Cohamacũ to jiri tahtia waropũ sãano, dũcatari suhtirore yũhdũ sãahna. ã sãano masa ya cjihtire sini payobasara Cohamacũre. To ã yoariro seheta Jesu cũhũ baharo mari wahahto seheta mũanopũ Cohamacũ cahapũ waharo, mari ya cjihtire sini payobasara Cohamacũre. Tópũ mari wahahto pano tiro sehe wahari jire. ã jiro jipihtia

dachoripe sacerdotea pũthoa bui pũthoro jira tiro. Melquisede sacerdote to jiriro seheta sacerdotea pũthoro jirucura tiro cũhũ.

Melquisede sacerdote to jiriro seheta Jesu sacerdote jira

7 ¹ Melquisede cjiro sehe Salẽ wama tiri maca macaina bui pũthoro jia tiri jire. Sacerdote jiro Cohamacũ tuarirore, mũano macarirore sini payobasariro jia tiri jire. ã jiro paina pũthoare Abrahã cjiro cahma wajã yũhdũrũca tuhsũ, to tjua tachũ waro Melquisede cjiro to ya macai jiriro Abrahã cjirore piti bocaro sũa tiri jire. ã piti bocaro tirore sini payobasaa tiri jire Cohamacũre: “Noano yoaga ahrirore”, ni sini payobasaa tiri jire Cohamacũre Abrahã cjirore. ² To ã piti bocahto pano Abrahã cjiro sehe tirore ñũ tuhtiinare wajã tuhsũ to wajãrina cjiri pũthoa yare naa tiri jire. To ã nari cjirire mahanocã waa tiri jire Melquisede cjirore. Cohamacũ to dutiriro purocãta mahanocã waa tiri jire Melquisede cjirore. Melquisede cjiro to wama sehe “Bui pũthoro noano yoariro jira”, nino nina. Tiro cjiro Salẽ wama tiri maca macaina pũthoro to jichũ to wama õ sehe nino nina: “Bui pũthoro noano jichũ yoariro”, nino nina. “Salẽ” nino, “Noano jia”, nino nina. ³ Ne Melquisede cjiro pũcũsumare, to pano ji mũhtainare to coyeare ti yahu joa õri mariahna. To masa bajarire, to yariari cũhũre yahu joa õri mariahna. ã jiro ã jirucuriro yoaro sehe jira tiro cjiro. To ã jiriro jichũ Cohamacũ tiro mehne marine piti dahre buhera. Cohamacũ to macũno to sacerdote to jirire marine buhera. Melquisede cjiro sacerdote ã jirucuriro yoaro sehe jira. Tiro yoaro seheta Cristo cũhũ sacerdote ã jirucuriro jira.

⁴ ã jiro Melquisede ne wiho jiriro jiera tiri jire. Abrahã mari ñũchũ cjiro pũthoro waro jiparota mahanocã to tjua narire tiro sehere waa tiri jire. Mahanocã waa tiri jire Melquisedere. ⁵ ã jia Cohamacũ dutia Moise cjirore to cũri dutia jipihtina paina Israe masare tó purota wapa dutira. ã dutiro Leví panamana ji turiainare ti coyea waparire ñaha dutiro, cũa tiri jire. Leví panamana sacerdotea wahaa tiri jire. ã jia Israe masa Abrahã panamana ji turiaina jipahta ti sacerdotearo wapa tiri jire. ⁶ Melquisede sehe Leví panamino ji turiariro jieraparota wapa naa tiri jire Abrahãre. Cohamacũ “Mũhũre noano yoaihtja”, to ni cũriro jiparota Abrahã sehe Melquisedere wapa tiri jire. ã jiro Melquisede sehe Cohamacũre Abrahãre sini payobasaro noano yoa dutia tiri jire. ⁷ Noano yoa dutiriro

Melquisede cjiro sehe to noano yoa dutiro bui Abrahã bui jira. Tíre mari noano masija. ⁸ Mari mehne macaina sacerdotea marine mahanocã wapa naina mari yoaro seheta masa jira. ã jia yariahtinata jira tina cũhũ. Ahriro Melquisede sehe Abrahãre mahanocã wapa nariro cjiro ã catirucuro yoaro sehe jira, mari piti dahre buhechũ. To yariarore yahueraro, ãta nino nia tiri jire Cohamacũ yare ti joari pũi. ⁹ Mipũ macaina Leví panamana ji turiaina sacerdotea jia, mahanocã wapa nana. ã jiina ti jipachũta Abrahã Melquisedere mahanocã waparo jipihntina Leví panamana ji turiaina ya cjihti cũhũre wabasaro sehe yoaro nia tiri jire. ã jia tina cũhũ Melquisedere mahanocã wapaina yoaro sehe jira. ¹⁰ Melquisedere Abrahã to wapari pjare Leví sehe masa bajuerasinia tiri jire. ã masa bajuerasiniparota to ñũchũno cjiro Abrahã pjacũpũ to jiboriro seheta Leví sehe ji tuhsũro nia tiri jire. ã jiro Melquisede Abrahãre to piti bocachũ Leví cũhũ to ñũchũno cjiro mehne jiro sehe jiro nia tiri jire. ã jia Leví, to panamana ji turiaina mehne Melquisedere mahanocã wapaina yoaro sehe jia, tina to docai jia nia tiri jire.

¹¹ To dutiare cũno Cohamacũ Levíre to coyera cũhũre sacerdotea ji dutia tiri jire. ã jia to dutia ti niriro seheta tina sacerdotea wahiquinare wajã jũ mũo, sinibasaa tiri jire Cohamacũre masa ya cjihtire. Ti ã yoari mehne mari yũhdũna, paio sacerdotere soro sehe jiro sacerdotere cahma namoeraboa mari. ã jina paio sacerdotere cahmaja mari mipũre, Melquisede yoaro sehe jirore. Leví ya curua macariro Aarõ cjiro yoaro sehe jiina sacerdoteara mipũre mari cahmaeraja. ¹² ã jina sacerdotere mari cohtotana, marine dutia cũhũre cohtotaro cahmana marine. (Sacerdotea ti yoadohoa mehne mari yũhdũeraro seheta tí dutia mehne mari yũhdũeraja. ã yoana tí dutiare cohtota pahũono cahmana marine.) ¹³ Aarõ, Leví cũhũ ti ya curua macaina dihtare sacerdotea sãa duti mũhtaa tiri jimare Cohamacũ to dutiare cũno. To ã dutipachũta mipũre mari pũhtoro sacerdote to sũriro pa curua macariro jira. Tí curua macariro ne sacerdote jierasinare. ¹⁴ Tiro Cristo Juda ya curua macariro masa bajuari jire. Tíre mari noano masija. Moise cjiro sehe sacerdotea sũno, Juda ya curua macainare ne cũiro sacerdote sũera tiri jire.

¹⁵ Ahrire masina, õ sehe mari noano masija: Mipũre wahma to sũriro sacerdote Cristo Melquisede yoaro sehe jiro jira.

¹⁶ Panopũ macaa dutia ti niriro seheta Leví ya curua macaina

dihta sacerdotea sãari jire. Mipure to sãiro sacerdote ti yoaro sehe jiro sacerdote sãerari jire. Tiro Cohamacu tuaa mehne jipihitia dachoripe jiro jira. ã jiro tí tuaa mehne sacerdote sãari jire tiro. 17 Õ sehe nina Cohamacu yare ti joari pũ:

“Jipihitia dachoripe sacerdote jirucuihca mũhũ.
Melquisede sacerdote to jiro seheta sacerdote
jirucuihca mũhũ, nia tiri jire Cohamacu to
macunore”,

ni joaa tiri jire panopũ. 18 To dutia to cũ mũhtari dutiare masa ti bihoerachũ yaba cjihti jierari jire. ã jiro tí dutiare duti namoerari jire Cohamacu. 19 Moise cjirore to cũri dutia mehne ne yũhdũerara masa. ã jiro mipũ sehene Cohamacu marine to yũhdũchũ yoahore marine cũre. To ã yoachũ mipure tiro cahapũ waha masija mari. ã yoa tiro mehne durucu masija.

20 ã yoa Cristore sacerdote sõno, “Yũ wama mehne potocã nii nija”, nino tirore sõri jire to Pũcũro. Paina sacerdotearo tirore to yoariro sehe wama payo sõerari jire. 21 Cristo sehe Cohamacu tuaro to yahuri mehne sacerdote sãari jire. Õ sehe nia tiri jire to Pũcũro Cristore:

“Yũhũ mũ pũhtoro yũ wama mehne mũhare
potocã yahuihtja.

Ahrire ne duhu cũno marieno yahuja mũhare.

Jipihitia dachoripe sacerdote jirucuihca mũhũ”,

ni cũa tiri jire Cohamacu to macunore. 22 ã “Yũ wama mehne potocã nii nija”, to nino mehne cũno, wahma buheare noaa buheare marine cũno, marine to yũhdũchũ yoahore cũno nia tiri jire. Panopũ macaa dutia yũhoro mari noano jihtore cũno nia tiri jire. ã cũno Cohamacu “Mũsare yũhdũchũ yoaihtja”, to niriro seheta yoaro taro, Jesure warocari jire marine yũhdũchũ yoahiro cjihtore. 23 Ji mũhtaina sacerdotea ti yariachũ ñaa paina cohtota sãana tjoa. ã jia tina payũ sacerdotea wahara. 24 Jesu sehe ã jirucura. ã jia tirore cohtotaina mariahna sacerdotea. 25 ã jiro tiro ã jirucuro, Cohamacure ã sini payobasarucura to yaina ya cjihtire. ã yoa Cohamacu mehne ti ã jirucuhto sehe masare yũhdũchũ yoa masina tiro. Jipihitia tirore wacũ tuaina Cohamacu cahapũ wahaahca. ã jiro Jesu jira pototi tinare yũhdũchũ yoariro.


26 ã jiro Jesu jira mari sacerdotea pũhtoa bui pũhtoro. Tiro pinihtare tuaro cahmaja mari. Ne ñaa buhiri marieriro jira tiro. Masa yoaro sehe ne ñaare yoerare. ã jiro Cohamacu

tirore ñaina cahai jirirore naahno, мѡанорѡ cũ, jipihtina paina bui pũhtoro sōri jire. **27** Paina sacerdotea yoaro sehe jierara tiro. Tina sehe dachoripe wahiquinare wajã, jũ мѡоа, Cohamacũre sinia tihre. Ti basi ti ñaa yoari buhirire sini mũhtaa tihre. Baharo paina masa ti ñaa buhiri cũhũre sinibasaa tihre tina. ã jia payũ tahari tina Cohamacũre sinia tihre. Jesu sehe sacerdotē jiro, cũ tahata to yariaa mehne siniri jire Cohamacũre masa ti ñaa buhirire cohãno taro. ã yariaro to basi to pjacũre to catia cũhũre Cohamacũre to waboriro seheta yoaro niri jire. **28** Cohamacũ dutia Moise cjirore to cũri cjiri sacerdotea pũhtoare sãa dutira. ã sãapahta ñaa marieina jierara ã sacerdotea sãa. Tí dutia baharo jia buhea mehne Cohamacũ “Yũ wama mehne potocã nii nija”, to nino mehne to yahuri buhea mehne to macũno sacerdotea pũhtoro sãari jire. Tiro sehe ñaa marieriro ã jirucura.

Cohamacũ “Mũsare yũhdũchũ yoaihtja”, ni cũha tjoa Moise cjirore to cũrire cohtotaro. Tíre yahubasariro jira Jesu

8 **1** Tí jipihtiare yahuna, ahri pinihtare mũsare yahuna nija: Mũsare sã yahuriro sacerdotea pũhtoa bui pũhtoro tiro pini mari yairo waro jira. Мѡанорѡ Cohamacũ tua yũhdũariro to pũhtoro dujiro cahai to poto bũhũsehei dujira Cristo mari sacerdotea pũhtoro. **2** ã jiro ahri yahpa macari wũhũi, masa ti yoari wũhũi sacerdotea dahraare yoerara tiro. Мѡанорѡ jiri wũhũpũre mari pũhtoro to yoari wũhũpũre sacerdotea dahraare yoara tiro. Tí wũhũ pinihta Cohamacũ waro ya wũhũ jira.

3 Jipihtina ahri yahpa macaina sacerdotea pũhtoa wahiquinare wajã jũ мѡоа, wara, Cohamacũre ño payoа. ãta yoa dutia tiri jire tinare. Mari yairo sacerdotē cũhũre wa dutia tiri jire Cohamacũre mari ño payohto sehe. Mari ñaa buhirire tirore wa dutia tiri jire. ã jiro Cristo mari ñaa buhiri yariaro wahchechũ yoari jire Cohamacũre sacerdotea pũhtoa Cohamacũre waa ti wahcheriro seheta. **4** Mari judio masa mari dutia ti niriro seheta ahri yahpapũ sacerdotea masa ti ñaa buhirire wara Cohamacũre sinia. Ahri yahpapũ sacerdotea ji tuhsũra. ã jiro Jesu sehe mari yairo sacerdotē ahri yahpapũ jisnino, sacerdotē jieraboa tiro sehe. **5** Ahri yahpa macaina sacerdotea ti dahraare ahri yahpa macari wũhũihta dahrara. Tí wũhũi Cohamacũre ti ño payorire ñũna mũano macari



wãhũpũre tirore mari ño payohtore masi cureja. “Tí wãhũ yoaro sehe jira”, nino nia tiri jire Cohamacũ tũcũ Moise cjirore to wãhũre dahre dutiro. To ã dahrehto panocã Cohamacũ õ sehe nia tiri jire tirore: “Tũcũ mũhũre yũ ñoriro seheta tí wãhũ to jiriro seheta yũ ya wãhũre quihõno dahrega”, nia tiri jire Cohamacũ tirore. ⁶ Mipũ sehere Jesu sacerdote jiro to dahraa paina sacerdotea ya dahraa yũhgoro jira. Wiho waro jierara. Cohamacũ marine “Mũsare yũhdũchũ yoaihtja”, to ni yahuri cjiri panopũ macaa dutia Moise cjirore to cũri dutia yũhgoro jira. Marine to yahuri cjiri tí dutia yũhgoro marine noano jichũ yoahca. ã jiro marine Cohamacũre yũhdũchũ yoabasariro jiro, Cristo sehe paina sacerdotea yũhgoro jira.

⁷ Wahmanopũre to dutiri cjiri mehne mari yũhdũeraja. Tí dutia mehne mari yũhdũchũ, paye buheare cũeraboa Cohamacũ. ⁸ Wiho mejeta tí dutiare ti yoa pahũno masierarire yahuro õ sehe nia tiri jire to yainare Israe masare:

“Õ sehe nina mari pũhtoro: ‘Noano tũhoga.

Baharopũ paye buheare “Õ sehe yoadohoihtja mũsare”, ni yahuihtja yũ yainare Israe masare, Juda ya curua macaina cũhũre.

⁹ Tí buhea ti ñũchũsũma cjirire yũ yahu cũri cjiri yoaro sehe ne jisi.

Yũ basi tinare Egipto yahpai jijnare na wiocũ tinare yahumai.

Yũ ã ni yahurire yũhdũrucare tina.

Ti ã yoachũ ñũscũ tinare ã ñũnocahi.

10 Ñ jicũ baharopũ Israe masare õ sehe ni yahuihtja:

Yũ dutiare tinare wacũchũ yoaihtja.

Ñ jia yũ dutiare yũhtiahca.

Ñ jicũ yũhũ Cohamacũ ti pũhtoro, tinare ñũ
wihboriro jiihtja.

Tina sehe yũ yaina masa jiahca.

11 Ñ jia tí pjare tina mehne macainare ne tina õ sehe

cahma nisi: “Mari pũhtorore Cohamacũre
masiga mũsa”, ne ni cahma buhesi.

Tina jipihtina yũhũre masi tuhsuahca.

Wihãinacã, bucũna cũhũ yũhũre masiina
dihta jiahca.

12 Ñ jicũ ti ñaa yoari buhirire boihca yũhũ.


Tinare buhiri dahresi yũhũ.

Ti ñaa yoari buhirire pari turi wacũsi yũhũ’,
nia tiri jire mari pũhtoro”,

nina Cohamacũ yare ti joari pũi. 13 Mipũre marine wahma
buheare cũno, panopũ macaa dutiare duhuro nire. Ñ yoa
mũna dutia cjirire mahanocã to duhuri baharo tí dutia cjiri
cohtotaa wahara.

Ahri yahpa macari tahtiare mũano macari tahtia cũhũre Cohamacũre ño payori tahtiare yahuha

9 1 Wahmanore Cohamacũ to dutiare Moise cjirore cũno
masa tirore dohse ti ño payohto cũhũre cũa tiri jire. Ñ
yoa Cohamacũre ti ño payohti wũhũ cũhũre yoa dutiro cũa
tiri jire. 2 Tí wũhũ wahiquina cahsari wũhũ jia tiri jire. Pũa
tahtia cjũaa tiri jire. Pjiwacũri tahtia ti sãa sũ mũhtari tahtia
Cohamacũ ya tahtia wama tia tiri jire. Tí tahtiai ti sihã
buhriadũ jia tiri jire. Ñ jiro mesa cũhũ jia tiri jire. Tí mesa bui
Cohamacũre ti wari pão pisaa tiri jire. 3 Pa tahtia suhti cahsari
mehne ti dũcatari tahtia jia tiri jire. Tí tahtia Cohamacũ to jiri
tahtia waro wama tia tiri jire. 4 Tí tahtiai uru mehne ti yoari
altar, inciensore ti jũ mũori altar jia tiri jire. Ñ yoa uru noaa
mehne ti duhu õri caro tói coãa tiri jire. Tí caro puhichapũ
uru wahwa maná wama tia chũa posa tiri wahwa jia tiri jire.
Ñ jiro tí caro puhichapũ Aarõ to tjuadũ cjiro pũri tidũ jia tiri
jire. Ñ yoa pũa pjĩ tãa pjĩni Cohamacũ to dutiare to joa õa



pjini cūhū tí caro puhichapū sãa tiri jire. ⁵ Tí caro bui p̄aro anjoa masū jia tiri jire. Tí masū Cohamacū to si siteare, tí tahtiai to jiare ñoa nia tiri jire. Tí caro mohano bui ti w̄ua d̄up̄ari mehne mohaa tiri jire. Tí caro mohano bui masa ñaa buhirire ti warire wajã site payoa tia tiri jire sacerdotea p̄ahoro. Tó purota yahuihtja ahri w̄uhū macaare mip̄ure.

⁶ ã yoa tí w̄uh̄ure ti noano cahnorí baharo sacerdotea dachoripe ti sãa sū m̄uhtari tahtiai sãa sū, ti dahraare yoaa tia tiri jire. ⁷ Sacerdotea p̄ahtoa bui p̄ahoro dihta pa tahtiap̄ū sãa tiri jire. C̄uhmaripe cū tahata to sãari dacho baroihta sãa tiri jire tiro. ã sãano ti wajãriro wahiquiro ti wariro dire na sãano, Cohamac̄ure ño payoa tiri jire. Di marieno ne sãaera tiri jire. To basi wacūenoca to yoari buhirire, to ñaa buhirire, jipihtina paina Israe masa wacūenoca ti yoari buhirire, ti ñaa buhirire dire na sãa tiri jire tiro Cohamac̄ure sini payoro taro.

⁸ Jipihtia ahri mehne Espíritu Santo õ sehe ni marine buhero nina: Tí w̄uh̄ai Moise cjirore to cūri w̄uh̄ai mari ño payosinina, to cūri dutiare yoahina jisina, wiho jiina Cohamac̄ure ño payona wahaeraboá mari. Sacerdotea p̄ahtoa bui p̄ahoro dihta Cohamac̄ū to jiri tahtia warop̄ū sãa masina. ã jina wiho jiina ti ño payoa wahaeraro seheta ãta jiboa mari cūhū Moise cjirore to cūri dutiare cjuasinina. ⁹ Ahri jipihtiare Cohamac̄ure ño payori w̄uh̄up̄ū jiare marine cūno, marine mip̄ū macainare

buhero niri jire Cohamacu. Wahiquinare wajã jũ m̃oa, masa Cohamacure ti ño payori mehne ne Cohamacu caharũ wahasi. Ti ã yoari mehne ti ñaa yoari buhirire cosawerara. 10 Ñ wahiquinare waa, ti chua, ti sihnia, ti pjacũ cosaa, ti õ sehe yoaa mehne Cohamacure ño payoa timari jire. Ahri ti ã yoari wiho warota jira mip̃re. Ñ yoa tí dutia Moise cjirore to cūri dutia marine noaina wahachũ yoaerari jire. Tí dutiare yoapanah̃ta m̃nanota jirucunocaja mari. Mari t̃hotuare cohtotaeraja mari. Ñ jia wahma buheare Cohamacu to cūri baharo m̃na dutia sehe yaba cjihti jierara.

11 Cristo sehe mari sacerdotea p̃htoro jiro ta tuhs̃ari jire. Ñ jiro marine noaare cū tuhs̃ari jire. Cohamacure ño payori w̃hũ m̃nanop̃ sacerdotea p̃htoro to dahrari w̃hũ paina sacerdotea ti dahraa w̃hũse ỹh̃doro noari w̃hũ jira. M̃ñano macari w̃hũ jira. Tí w̃hũ ahri yahpa macari w̃hũ jierara. Ñ yoa masa ti yoari w̃hũ jierara.



12 Cristo muanopu Cohamacu to jiro waropu cã tahata sãari jire mari ñaare yoari buhirire Cohamacure waro sehe yoaro taro. Tõpu muanopu õpu to jiri tahtia waro yoaro sehe jira mari piti dahre buhechu. ã yoaro cabritoa dire, wachuacã dire na sãa, waerari jire tiro. Tiro sehe to ya di warore Cohamacure to waro sehe yoaro niri jire yariaro. Jipihtia dachoripe Cohamacu mehne mari jirucuhto sehe to dire cohãri jire. Mari ñaa buhirire yariari jire. 13 “Yariainare pihana musa pjacu wete tiina jira”, ni cãa tiri jire Cohamacu Moise cjirore. Tõ sehe jia ñaare wete tiare cosawea tiri jire cabritoa dire ti wari mehne. Wachua dire ti wari mehne, wachuacãre ti jãri nitine ti wari mehne tõ sehe jia ñaare cosawea tiri jire. 14 Tõ sehe jia ñaare wahiquina dire ti wari mehne, nitine ti wari mehne ti cosaweriro seheta tí yũdoro Cristo sehe to dire to cohãno mehne mari ñaare yoarire noano cosawe pahñonocahna. Tiro ñaa marieriro jiro, crusapu yariaro to basita to pjacu to catia mehne Cohamacure waro sehe yoari jire. Espiritu Santo ã jirucuriro to yoadohoa mehne ã yoari jire tiro. ã yoa mari ñaa yoari buhirire Cristo to cosawechu ñuno mari ñaa buhirire Cohamacu bonocahno, mari ñaa yoarire duhuchu yoara. Tí ñaa buhirire cjuasinina pichacapu wahahtina jimai mari. To cosawerina jina, Cohamacu catiriro yare yoaina jija mari.

15 ã jiro “Õ sehe musare yũdũchu yoaihtja”, masare Cohamacu to ni yahu cũchu Cristo sehe to yahuaire yahubasariro jira. ã yahubasara tiro Cohamacu to beserinare yũdũchu yoaro taro. To ã yũdũchu yoachu jipihtia dachoripe tiro mehne jirucunahca mari to yaina. ã jina mari to yainare Cohamacu to wahtire cjuanahca mari. Moise cjirore to cãri dutia dihta jichu masa ti ñaa buhiri jisinia tiri jire. ã yoa crusapu yariaro tí pjata ti ñaa yoari buhirire yũdũchu yoari jire tiro to yainare. 16-17 Masuno baharo to coyeare to wahtire joa õyura papera pũi. To wahtire yahuro taro joa õyura. Tí pũre joa õyuriro to yariaerasinichu tí pũ yaba cjihti jierara. To coyea to cjuarire na masierasinina. Wiho mejeta, to yariachu ñua tí pũi to ni joariro seheta to yare naahca tina. 18 To yariahto pano tí pũ to yaba cjihti jieraro seheta yariaro marieno di wijaro marieno Cohamacu Moise cjirore to cãri dutia cũhu ne yaba cjihti jierabo. ã jiro wahiquiro dire sacerdote to wajã siteri baharo to dutiare quilhõnota yoaro nia tiri jire. 19 ã yoaro õ sehe yoa

mũhtaa tiri jire Moise cjiro: Cohamacu to cūri dutiare masare yahu pahñoa tiri jire. Baharo wachuacã dire, cabritoa dire co mehne morea tiri jire. Tuhsu, hisopo wama tidu dũpu mehne oveja pjoari sohãa mehne ti ñimiori pjoarire torẽa tiri jire. Tí dũpu mehne dire soharo, Cohamacu dutiare to joari tju bui wajã site payoa tiri jire. Jipihtina masa bui cũhure wajã site payoa tiri jire. 20 Ñ yoaro õ sehe nia tiri jire tiro: “Cohamacu marine to yahuri cjiri to dutiri cjiri ahri di mehne ti potocã jichu masija mari. Ahri dire ñuna to niriro seheta marine to yoahrire masija mari. Tí dutiri cjirire yuhti dutiri jire tiro marine”, nia tiri jire Moise cjiro. 21 Ñ yoaro masare to yoariro seheta Cohamacure ti ño payori wũhu wahiquina cahsari wũhure, jipihtia tí wũhui jia cũhure wajã sitea tiri jire. 22 Ñ tjira. To dutia ti niriro seheta payu ñaare di cohãno mehne cosawero cahmana. Mahanocã dũhsaa ñaare paye baro mehne ti cosawechu noana. Ñ jiro Cohamacu mari ñaa yoari buhirire ne bosì to di cohãerachu.

Cristo to dire cohãno, to yaina ti ñaa yoari buhirire cosawehea

23 Tí jipihtia Cohamacure ti ño payori wũhu, tí wũhui jia cũhu mũano macari wũhui jia yoaro seheta jiri jire mari piti dahre buhechu. Mũano macari wũhu sehe potocãta Cohamacu ya wũhu waro jira. Ñ jia ahri yahpa macari wũhure, tí wũhui jia cũhure wahiquina dire to wajã siteri mehne cosawero cahmari jire. Tí yũdoro mũanopu wahahtinare ti ñaa buhiri cjuainare cosawero cahmana. Ñ jiro wahiquina yũdoro jiriro ya di to cohãno mehne tinare ti ñaa yoari buhirire cosawero cahmana. 24 Ñ yoa Cohamacure ti ño payori wũhu masa ti yoari wũhu jira. Mũano macari wũhu yoaro seheta jira tí wũhu cũhu, mari piti dahre buhechu. Ñ jiro Cristo sacerdote jiro marine sini payobasaro taro ahri yahpa macari wũhure sãaerari jire. Potota mũanopu wahari jire tiro Cohamacu panoi marine sini payobasaro taro. 25 Mari judio masa mari sacerdotea puhto bui puhtoro cũhmaripe Cohamacu to jiri tahtia waropu sãa tiri jire wahiquina dire waro taro. Cristo sehe to dire Cohamacure waro sehe yoaro taro, yariaro payu tahari sãaerari jire. 26 Payu tahari yariariro jiro, ahri yahpa to jiro puro payu tahari yariaboa tiro. Payu tahari tiro mari ñaa buhirire yariarucuriro jiboa. Wiho mejeta pihtiri dacho panocã mipure marine jipihtinare yũhdũchu yoaro taro cũ tahata

bajuari jire tiro ahri yahpai. Ñ bajuari jire to yariaa mehne mari ñaa buhirire cohãno taro. ²⁷ Jipihtina masa cũ tahata yariaahca. Ti ã yariari baharo masa noainare, ñaina cũhũre beserohca Cohamacũ. ²⁸ Cũ tahata mari yariaro seheta Cristo cũhũ cũ tahata yariari jire payũ masa ti ñaa yoari buhirire cohãno taro. Baharo pari turi tarohca. Mari ñaa yoari buhirire cohã tuhsũriropũ jirohca. Ñ jiro pari turi mari ñaa yoari buhirire cohãno taro nisi. Ñ taro tirore cohtainare wahchea mehne tirore ñũ duainare yũhdũchũ yoaro tarohca.

10 ¹ Cohamacũ to dutia Moise cjirore to cũri cjiri noaa buhea yoaro seheta jipahta, cũno potori jierara. Tí dutia ti yoa dutiriro seheta cũhmaripe wahiquinare wajã, jũ mũo, Cohamacũre ño payorucura. Ti ã yoaa mehne masa ti ñaa yoari buhirire cohãerara. ² Tí mehne ti ñaa yoari buhirire cohãa, cũ tahata Cohamacũre ti ño payori baharo “Mipũre ñaa buhiri mariahna sãre”, ni tuhutuboa masa. Ñ jia pari turi wahiquinare wajã jũ mũo Cohamacũre ño payoeraboa. Ti ã yoarire duhunocaboa. ³ Cũhmaripe wahiquinare wajã jũ mũo, Cohamacũre ti ño payochũ tí tinare ti ñaa yoari buhirire wacũchũ yoara. Tó purocãta yoadoho duara tí tinare. ⁴ Wachũa di mehne mari ño payori mehne, cabritoa di mehne mari ño payori mehne ne mari ñaa yoari buhirire cohãerara.

⁵ Tí potocãta jira. Ti ã jichũ ñũno Cristo ahri yahparũre to tahto pano õ sehe nia tiri jire Cohamacũre:

“Wahiquinare jũ mũo ti wachũ, trigo pohcare ti wachũ cũhũre mũhũ ñũcũ ñũ ji coerara mũhũ.

Ñ jicũ yũ pjacũre yoare mũhũ yũ ya pjacũ cjihtore.

⁶ Ñaa yoari buhirire ti cohãhtore wahiquinare wajã ti jũ mũochũ ñũcũ ñũ ji coerara mũhũ.

⁷ Mũ ã ñũ ji coerachũ ñũcũ õ sehe nihi mũhũre:

‘Õi jija. Mũ cahmano seheta yahparũ yoai wahaihtja.

Áta yũhũre ni yahura mũ ya tjurũ’, nihi yũhũ”,

nia tiri jire Cristo to Pũcũrore. ⁸ “Wahiquinare jũ mũo ti wachũ ñũcũ, trigo pohcare ti wachũ cũhũre ñũcũ ñũ ji coerara mũhũ”, ni yahu mũhtaa tiri jire tiro. Wahmanopũre to dutia wahiquinare, trigo pohca cũhũre ti waa mehne ti ño payo dutipachũta ã nia tiri jire tiro. ⁹ Ñ ni tuhsũ õ sehe ni namoa tiri jire: “Õi jija. Mũ cahmano seheta yahparũ yoai wahaihtja”, nia tiri jire. To ã nichũ õ sehe masija mari. Panopũ wahiquinare wajã jũ mũoa mehne ti ño payori cjirire duhuchũ yoaro paye

buhea sehere cūno niri jire Cohamacu. Ñ cūno mipure Cristo to yariaro mehne masare yuhduchu yoarohca Cohamacu. **10** Jesucristo to pjacure waro, yariaro, jipihtina mari to yainare mari ñaa buhirire cohāri jire. Cū tahata to pjacure wari jire mari ñaa yoari buhirire cohāno taro. Ñ yoaro Cohamacu to cahmano seheta yoaro niri jire.

11 Jipihtina mari judio masa mari yaina sacerdotea dachoripe Cohamacure ño payori wuhni dahrarucura. Ñ dahrarucua dachoripe mnanota wahiquinare wajã, jũ mo, Cohamacure sinirucura. Ti ã wajã jũ mopachuta tí mari ñano yoari buhirire ne cohāerara. **12** Cristo sehe cū tahata mari ñaa yoari buhirire yariaro, mari ñaa yoari buhirire noano cohā pahñonocari jire. Tíre cohā tuhsu wahaah wahari jire to Pucuro cahapũ to poto buhusehei dujiro waharo. Pũhtoro jiro tópu dujira. **13** Tópu dujiro cohtaro nina. Tirore ñu tuhtiinare Cohamacu sehe to yuhdurucabasahtore cohtaro nina Cristo. **14** Ñ jiro cū tahata to yariaro mehne ti ñaa yoari buhirire to cohābasarinare ñaa buhiri marieina ti ã jirucuchu yoara tiro. **15** Tí potocã tjira. Ñta ni yahura Espiritu Santo marine. Ñ sehe ni yahura tiro:

16 “Ñ sehe nina Cohamacu: ‘Baharopure ñ sehe ni yahuihtja Israe masare, “Yũ dutiare ti wacũapũ cūihtja” ’, ni yahuihtja”, nina tiro. **17** Ñ sehe ni namona Cohamacu: “ ‘Ti ñaa yoari buhirire yũ dutiare ti yuhdurucari cũhure pari turi wacũ namosi yuhũ’, nina tiro”, ni yahura Espiritu Santo. **18** Mari ñaa yoari buhirire to ã bochu pari turi mari ñaa yoari buhiri yariahtirore cahmaeraja mari.

Cohamacu cahai suna cuiro marieno tiro mehne mari durucuboriro seheta tiro mehne durucu masija mipure

19 Ñ jina yũ coyeya Cristo to yariaro mehne to di cohāno mehne mipure mari cũhũ cuiro marieno Cohamacu to jiri tahtia waropũ sãana, tiro mehne durucu masija. Ñ yoana tirore sini masija. **20** Mari catirucuhto cjihtore Cohamacu marine ã coã yoaro niri jire. Cristo sehe mari ñaare yoari buhirire yariaro to di cohāri mehne Cohamacu mehne durucu masija mari. Sacerdotea pũthoa bui pũhtoro tí tahtiapũ to sãariro seheta Cristo sehe Cohamacu cahapũ sũri jire mari ñaa yoari buhirire bo dutiro waharo. Tí tahtia macari suhtirore dũcatari suhtirore

to tũhrẽ cohãboro seheta Cristo to pjacure cohãri jire Cohamacũ mehne mari jirucuhto sehe. ²¹ ã jiro Cohamacũ ya wũhũi dahrariro mari Yairo Sacerdote tua yũhdũariro jira tiro. ²² ã jina Cohamacũre sinijihna mahõono marieno. Tirore noano wacũ tuaa mehne, cuiro marieno tirore sinijihna. Cristo mari ñaa yoari buhirire to cosaweinapũ jija. ã jina “Buhiri tiina jija mari”, ni tũhotuina jieraja mari. ã yoa wete mariea co mehne mari cosawero seheta Cristo to cosaweinapũ jija. ã jiina jina Cohamacũre sinijihna. ²³ “Mũsare yũhdũchũ yoaihtja”, to niriro seheta yoarohca. ã jina tiro marine to yũhdũchũ yoahore noano masija mari. Tĩre masina, ne boena tjjihna. Cohamacũre ã wacũ tuarucujihna. ²⁴ Mari mehne macainare cahĩna, tinare yoadohojihna mari jipihtina mari cahma cahĩ yoadohohto sehe. ²⁵ ã jina noano cahmachurucujihna Cohamacũ yare yoana tana. Paina sehe ti cahmachumarirore duhua nina. Tina yoaro sehe yoarena tjjihna. Mari mehne macainare wahchechũ yoajihna. Ahri yahpapũre mari pũhtoro to tahto mahanocã dũhsara. Tĩre masina tuaro wahchechũ yoajihna mari mehne macainare Jesu yainare.

²⁶ Potocã jia buheare noaa buheare mari masipanahta ñaare mari pari turi ã yoarucuchũ mari ñaa yoari buhirire cosawe namohto basioerara. ²⁷ ã jiro tó sehe yoainare cua nina. Jipihtina tirore ñũ tuhtiinare buhiri dahrero, tuaro jũnoi cohãnohca Cohamacũ tinare. ã jia to buhiri dahrehtore cuiina dihta jimana tirore duhuina. ²⁸ Cohamacũ dutia Moise cjirore to cũri cjirore yũhdũrũcainare buhiri dahrea, mari coyera judio masa wajãna tinare. Ne pja ñũno marieno wajãna tinare. Tiaro ti yahusãchũ tũhoro beseriro ti yũhdũrũcarire masino tinare buhiri dahre dutira. Tiaro mariachũ pũaro ti yahusãchũ tinare buhiri dahre dutira. To ã dutichũ tinare wajãna. ²⁹ Tĩ yũhdoro Cohamacũ macũnore ñũ yabiina to buhiri dahrehtina jiahca. Cohamacũ Cristo to di cohãno mehne mari ñaa yoari buhirire cohãna. To ã cohãhtore yahuri jire tiro marine. ã jia tina ti ñaa yoari buhirire cohãrina jipahta baharo pari turi ñaare yoarucua ti ñaa yoari buhirire to cohãrire to di cũhũre “Wiho waro jira”, nia nina. ã niina, to buhiri dahrehtina waro jia niahca. ã niina Espĩritu Santore ñano ni durucuina jira. Tiro tinare cahĩro jira. Ti ã ñano durucuchũ ñũno tuaro buhiri dahrerohca Cohamacũ tinare. ³⁰ Ahrire mari noano masija. Cohamacũ to basita õ sehe nia tiri jire: “Yũhũ jija

buhiri dahrehtiro. Ti ñaare yoari buhiri buhiri dahrehtja yũhũ”, nia tiri jire tiro. Õ sehe ni namoa tiri jire: “Yũhũ ñano yoainare yũ yainare buhiri dahrehtja”, nia tiri jire tiro.

31 Cohamacũ catiriro marine to buhiri dahrechũ cua yũhdũara.

32 Панорũ mũsa jirire wacũga mũsa. Tí pjare Cohamacũ yare wahma masi dũcana payũ tahari ñano yũhdũpanahta to yare duhuerare mũsa. **33** Cãa tahari masa ti ñũrocaroi paina mũsare ñano ni, ñano yoapere mũsare. Paina Jesu yainare ti ñano yoachũ ñũna, tinare pja ñũ, tinare piti tire. **34** Ti peresu yoainare pja ñũre mũsa. Tuhsũ, mũsa yare ti mapachũta wahchea mehne, “Noanohca”, nire mũsa. Ahri yahpa macaa yũhgoro noaare cjuara mũsa mũanorũ. Tí noaa ã jirucuahca. Tĩre masina, mũsa cjuare ti machũ cahyaerare mũsa. **35** ã jina cuiena tjiga. Cohamacũre ã wacũ tuarucuga. Mũsa ã yoachũ ñũno tiro noano yoarohca mũsare. **36** Cohamacũ “Mũsare õ sehe yoadohoihtja”, to ni cũrre noano cohtaga mũsa ñano yũhdũpanahta. ã cohtaina jina to cahmaare yoanahca mũsa. ã yoana to ni cũrre cjuanahca. **37** Õ sehe nina Cohamacũ yare ti joari pũi:

“Mahanocã dũhsara Cristo to wihihito.

ã taro dói wihi bahrañonohca.

38 Yũ yaina noaina sehe yũhũre wacũ tuarucuahca.

ã yoaa yaina jirucuahca.

Yũhũ mehne ã jirucuahca.

Yũ yare cohãina sehere ñũ yabija yũhũ”,

nia tiri jire to ya durucua ti joari pũi. **39** Mari sehe Cohamacũ yare cohãina jieraja mari. ã jina pichacapũ wahahtina jieraja mari. Cohamacũre wacũ tuaja mari. ã jina to yũhdũchũ yoaina jija.

Wacũ tuaare yahuha

11 **1** Õ sehe jira wacũ tuaa: Cohamacũre wacũ tuana, marine to noano yoahore noano masija mari. Cohamacũ to niriro seheta to yoerasinipachũta to yahuare “Potocã tjira”, ni tũhotuja mari tirore wacũ tuana. Tirore ñũerapanahta, tirore wacũ tuana, “Potocã tjira”, ni tũhotuja mari to yahuare tũhona. **2** Панорũ macaina Cohamacũre ti wacũ tuachũ ñũno ñũ ji coaa tiri jire tiro sehe.

3 Cohamacũ to durucua mehne jipihtiare bajuamehnea tiri jire. ã jiro tiro mari ñũerari mehne jipihtia mari mipũ ñũare

bajuamehnea tiri jire. Tíre mari noano masija Cohamacure wacū tuana pinihta.

⁴ Cohamacure wacū tuaro Abe sehe corderore wajã, jũ mño, Cohamacure ño payoro “Noana”, nia tiri jire. To wahmino Caĩ yũdoro noanore waro, ño payoa tiri jire tiro Cohamacure. Ñ jiro Cohamacu to warire wahchea tiri jire. Ñ wahchero “Noariro jira”, ni ñña tiri jire tiro Abere. Ñ Cohamacure to wacū tuachũ ñña mari tirore ññ cūja. To yariari baharo jipachuta to wacū tuarire ññ cūja mari.

⁵ Enoco Cohamacure to wacū tuachũ ñño wahchea tiri jire Cohamacu. Ñ wahchero tirore to cahapũ na mñoa tiri jire. Ñta nina Cohamacu yare ti joari pũi. To na mñori baharo ne masa tirore bocaera tiri jire. To na mñoriro jiro ne yariaera tiri jire. ⁶ Cohamacure wacū tuaerana, tirore wahchechũ yoa masieraja mari. Cohamacure wacū tuaerana, tirore ño payo masieraja mari. “Potocãta tiro Cohamacu warota jira. Ñ jiro tirore mari ño payochũ marine noano yoara tiro”, mari ni tũhotuerana tirore sini masieraja mari.

⁷ Noé Cohamacure wacū tuaro, tirore to yahurire noano yũhtia tiri jire. Baharopũ ti ñano wahahtore to yahuchũ tũhoro noano yũhtia tiri jire tiro. Ñ yũhtiro, pjiria dohoriare yoaa tiri jire. Ñ yoa tia dohoria mehne tiro to coyea mehne dia miniore yũhdña tiri jire. Ñ wacū tuariro jiro ahri yahpa macaina ñaina ti wacū tuaerarire ti pichacapũ ti wahahto cũhũre ñono nia tiri jire. Ñ jiro to wacū tuachũ ñño “Noariro jira”, ni ñña tiri jire Cohamacu tirore.

⁸ Abrahã cjiro cũhũ Cohamacure wacū tuaro tirore yũhtia tiri jire. Pa dihtapũre tirore to wahti dihtapũre Cohamacu to waha dutichũ tũhoro Abrahã yũhtia tiri jire. To ya dihtai jiroro wijaa waharo, to masierari dihtapũ sua tiri jire. ⁹ “Ahri dihtare mũhũre waihtja”, Cohamacu to nichũ tũhoro tirore wacū tuaro tí dihtaihta tjuaa tiri jire tiro. Tói jiro pa dihta macariro jiparota tóihta tjuanocaa tiri jire. Tirore, to macũno Isaa cũhũre to panamino Jacobo cũhũre tina caĩnare “Ahri dihtare mũsare waihtja”, ni yahua tiri jire Cohamacu sehe. Ñ jia tina tí dihtai jia, wahiquina cahsari wũhũsei jia tiri jire mũnana jieraina jia. ¹⁰ Tói jisinia tiri jire Abrahã Cohamacu mehne to jiltore cohtaro. Pa macapũ Cohamacu to jiri macapũ mũanopũ to wahahtore cohtaro nia tiri jire tiro. Tí macare dahrea tiri jire Cohamacu. Ñ jiro tí maca ne pihtisi.

11 Cohamacure wacũ tuaro Abrahã cjiro bucuro waro jiparota, to namono Sara mehne pohna tia tiri jire. To namono pohna marienicoro to jipacheta, “To niriro seheta yoarohca”, Cohamacure nino, tirore wacũ tuaro pohna tia tiri jire Abrahã. 12 ã jiro Abrahã bucuro waro jiparota pohna tia tiri jire. ã jia to panamana ji turiainapɯ payɯ wahanocari jire. Ñahpichoha perire, padɯ pohcaricã cũhure mari quihõna bihoeraro seheta to panamana ji turiaina cũhure quihõna bihoeraja mari.

13 Jipihntina ahrina yɯ yahuina cjiropɯ Cohamacure wacũ tua tuhsuinapɯ yariaa tiri jire. Cohamacu tinare “Mɯsare waihtja”, to ni quihõ cũrirore sɯerapahta yariaa tiri jire. Tíre ñahaerapahta Cohamacu to niriro seheta yoari pja baharopɯ ti cjuahtire masia tiri jire. ã masia wahchea tiri jire. ã jia õ sehe nia tiri jire tina: “Ahri yahpai tiniina jija. Pa yahpa macaina jija”, nia tiri jire tina. 14 Tó sehe niina pa yahpare ti ya yahpa cjihtore cohtaa nina. Tíre mari noano masija. 15 “Pa yahpa macaina jira”, nicu panopɯ ti cohãri yahpare nicu nieraja. Pa yahpapɯ ti ji muhtari yahpapɯ waha duaa, wahaboa. 16 Noa yũhdɯari yahpa sehene cahmaa nia tiri jire. Tí yahpa muapanopɯ jira. Ti ã cahmachu ñɯno “Cohamacu sã puhtoro jira”, ti nichu tuhoro buo tierara Cohamacu. Ti ya maca cjihtore dahrebasa tuhsua tiri jire tiro.

17-18 Cohamacu Abrahãre to macunore Isaare wajã jũ mɯo dutia tiri jire. Tirore ñu duaro ã dutia tiri jire, “¿Potocãta yũhure wacũ tuajari?” nino. Cohamacure wacũ tuaro to niriro seheta yoaa tiri jimare Abrahã. “Mɯ macu Isaa mehne mu panamana ji turiainare payɯ cjuaihca muhɯ”, Cohamacu to niriro jipacheta to macunore wajãno taro nia tiri jimare Cohamacure ño payoro taro. 19 “Yɯ macu Isaare yɯ wajãchu Cohamacu tirore masonohca”, ni tuhóturo tirore wajãno taro nia tiri jimare. ã niriro jiparota Cohamacu tirore ducata, wajã dutiera tiri jire. To pɯcuro to ã wajãboriro jiro, masariro yoaro sehe jia tiri jire Isaa, Abrahã to ñuchu. ã jiro Abrahã tirore catirirore pari turi cjuaa tiri jire.

20 Isaa Cohamacure wacũ tuaro, to pohñare Jacobore, Esaú cũhure “Baharopɯ Cohamacu mɯsare pjíro noano yoarohca”, nia tiri jire. 21 Cohamacure wacũ tuaro Jacobo to yariahto panocã José pohñare, muare “Cohamacu mɯsare pjíro noano yoarohca”, nia tiri jire Jacobo. Na tuhcuca caha sɯ, to tjuadɯ mehne tjua ñaha caha sɯ, Cohamacure ño payoro, “Cohamacu

músare noano yoarohca”, ni cūa tiri jire. **22** Cohamacure wacū tuaro José to yariahto panocã Israe masa Egiptoji jina ti wijaahore yahuyua tiri jire. ã ti wijaahore masiyuro to yariari baharo to pjacu cjirore naa dutia tiri jire to pohñare.

23 Cohamacure wacū tuaa, Moisecãre tia sũ waro nũo cjuaa tiri jire to pũcũsũma, to masa bajuari baharo. Noarirocã to jichũ ñua tirocãre nũoa tiri jire. Tí yahpa macaina bui pũhtoro ti pohñare to wajã dutirore yũhdũrucanocaa tiri jire tina. Tirore cuiera tiri jire. **24** Moise cjirore bũcũoricoro Egipto yahpa macaina bui pũhtoro macono jia tiri jire. ã to bũcũoriro jiro Cohamacure wacū tuaro “Ticoro macũno”, tirore ti ni pisuchũ cahmaera tiri jire Moise. **25** Cohamacure yũhdũrucariro jiro tirore bũcũoricoro cahapũ mahaa nũmũricã noano jiboa. ã jiboriro jiparota tí yũhdoro tiro Cohamacũ yaina mehne ñano yũhdũ duaa tiri jire. **26** ã ñano yũhdũro Cristore ti bũjũpehto seheta ti bũjũperiro jia tiri jire. Baharopũ to noano yoari wapa Cohamacũ tirore to noano yoahore masino ñano yũhdũ duaa tiri jire Cristo to ñano yũhdũhto seheta. Jipihtina Egipto macaina ti noaare ti cjuaro yũhdoro tiro Cohamacũ sehene tuaro cahmaa tiri jire. Ñano yũhdũparota, Cohamacure cahmaa tiri jire. **27** Cohamacure wacū tuaro, Egipto macaina bui pũhtoro tiro mehne to suachũ cuieraa tiri jire Moise. ã cuieraro tí yahpai jiriro tí yahpare cohã wahcãa waha tiri jire. ã waharo Cohamacure bajuerarirore to ñũboriro seheta cuierariro jia tiri jire. Cohamacũ tirore to yoa dutirire ne duhuera tiri jire Moise cjiro.

28 Cohamacure wacū tuaro Moise cjiro Israe masare Cohamacũ to yũhdũchũ yoahore masia tiri jire. ã masino Cohamacũ to dutiriro seheta Israe masa ti sopacarire òa pjĩnine di mehne wajã site dutia tiri jire tiro. Ti ã yoachũ ñũno anjo masare wajãriro ti masa wahmisũmare wajãboriro Israe masa ti wahmisũmare wajãera tiri jire. **29** Cohamacure wacū tuaa, Israe masa “Sohãri ma”, ti niri mapũ co watoj jiri wahsai co marieni wahsai waha waha tiri jire. Ti ã wahachũ ñua Egipto macaina cũhũ tinare ñũ cũ, nũnũ ti wahcãmaa, mini yariaa waha tiri jire.

30 Cohamacure wacū tuaa Israe masa Jericó wama tiri maca macari sahrĩno tãa mehne ti yoari sahrĩno sũ bũtiri sahrĩno baharo bũhũsehei soroa majarea tiri jire. Siete dachori waro tí macare soroa tinia tiri jire. Tópe dachori ti soroa tiniri baharo

tí sahrĩno sehte bora pihtia waha tiri jire. ³¹ Cohamacure wacũ tuaro tó pano mña mehne ñano yoarucuricoro cjiro Rahab wama tiricoro, tí maca macaricoro Israe masare yoadohoa tiri jire. Tí macare ti cohãhto pano mahainacã Israe masa tóprã sãa ti duhti ñuchũ ticoro tinare yoadohoa tiri jire. To ã yoadohochũ ñña Israe masa wajãera tiri jire ticorore. Tí maca macainare Cohamacure yũhdurucainare wajãpahta ticoro sehere wajãera tiri jire.

³² Painare Cohamacure wacũ tuainare yahu namoboa yũhũ. ã yahu duapaihta payure ã Cohamacure wacũ tuainare yahu joa pahño masieraca yũhũ. Payũ jira tina. Gedeõ, Baraca, Sansõ, Jefté, Davi, Samue, Cohamacũ yare yahu muhtaina cũhũ ahrina jipihtina yũ yahuborina jira. ³³ Cohamacure wacũ tuaina cãina paye yahparipũ jia, tí yahpari macainare cahma wajã yũhdurucãa tiri jire. ã yoa paina noano dutiina jia tiri jire. Cohamacũ tinare “Mũsare yoadohoihtja”, to niriro seheta tinare yoadohoa tiri jire. Tirore ti wacũ tuachũ ñũno ã tinare yoadohoa tiri jire. ã wacũ tuaa, yaya tinare ti chũ duachũ ti dũserire bihachũ yoaa tiri jire tina. ³⁴ Tuaro jũri pichacarpũ jipahta jũera tiri jire tina Cohamacure wacũ tuaa. Paina tinare ti ñosa wajã duachũ duhti wahcãa waha tiri jire Cohamacure wacũ tuaa. Tuaeraina jipahta Cohamacure wacũ tuaa, tuaina waha tiri jire. Cohamacure wacũ tuaina jia, cahma wajã tuaina jia tiri jire. ã jia paye yahpari macaina surara tinare wajãa taina ne cũno pjaera tiri jire tinare. ³⁵ Cãa numia Cohamacure ti wacũ tuachũ ñũno ti coyeyã ti yariachũ ñũno Cohamacũ sehe tinare masobasaa tiri jire.

Paina “Cohamacure cahmaena tjiã”, ti ni peresu yoaina ti ñabiaro yoapeina Cohamacure wacũ duhuera tiri jire. “Cohamacure mũsa wacũ duhuchũ mũsare wionahca”, nia tiri jimare tinare peresu yoaina Cohamacũ yainare. Ti ã nipachũta tinare yũhtiera tiri jire Cohamacũ caharpũ tuaro waha duaã. ã jia tinare ñabiaro ti yoapechũ yariaa waha tiri jire. ³⁶ Painare Cohamacure wacũ tuainare ñano ni bũjũpe tinare tjana mũjaa tiri jire. ã yoa painare dahporire, yachũrĩre dũhtenoca peresu yoaa tiri jire. ³⁷ Cohamacure wacũ tuainare ñaina tãa mehne doca wajãa tiri jire. Painare ti pjacũrĩre seroti mehne yihso ta mũjaa tiri jire. Painare ñosaa pjĩni mehne ñosa wajãa tiri jire tina. Ti ã ñano yoapeina oveja cahsari mehne, cabra cahsari mehne suhti tiina pjacũoina jia tiri jire. ã jia

paina tinare ñano yoapea tiri jire. ³⁸ Tina Cohamacure wacū tuaina peri yu yahuina noa yūhdūaina ti jichu ahri yahpa macaina ñaina tina mehne jiborina jierara. Ahrina Cohamacure wacū tuaina wūhuse marieina jia, masa marienopu, tūyucupū ji sitotaa tiri jire. Ā ji sitotaa, tūyucupū jia coparipū, yahpai jia coparipū cūhure carī sitotaa tiri jire. ³⁹ Ahrina jipihtina Cohamacure ti wacū tuachū ñano wahchea tiri jire tiro. Ti ā wacū tuapachuta Cohamacu tinare “Mūsare yūhdūchū yoaihtja”, to niriro mū sūerasinia tiri jire. ⁴⁰ To yūhdūchū yoerasinirire yahuro ō sehe ni tūhotua tiri jire Cohamacu. “Ahrina yū yainare baharopū jiina yū yaina mehne cūno potori yūhdūchū yoaihtja”, ni tūhotua tiri jire. Ā ni tūhoturo to niriro seheta yoarohca. To ā yoachū noa yūhdūara to pano yoariro yūhdoro.

Jesure ā wacūrucujihna mari

12 ¹ Ā jina ahrina yū yahurinare payū Cohamacure wacū tuainare masina, jipihtia ñaa yoare duhunocajihna mari cūhū. Ō sehe jira mari piti dahre buhechū: Mūrocaperirore tirore mūroca tuachū dojomehnea jira paye. To dahpo suhti nūcūa suhti tirore mūroca tuaerachū yoaboca. Tí yoaro seheta Cohamacu cahmaare mari yoa duachū dojomehnea cūhū jira. Ahri cūhure duhujihna mari. Ā yoana mūrocapeina soro marieno ti mūrocaro seheta mari cūhū Cohamacu to cahmano seheta soro marieno yoajihna. ² Ā jina Jesure ā wacūrucujihna mari. Tirota jira marine wacū tua dūcachū yoariro. Ā yoa marine wacū tua namochū cūhure yoara tiro. Crusapū yariaro cūno pjari jire. Baharo to wahchehtore masino crusapū yariari jire. Ā yariaro būo taboriro jiparota būo tierari jire tiro. Ā yoaro mipūre Cohamacu to pūhtoro dujiro poto būhūsehei dujitjiāhno tiro dutiriro jira.

³ Ñaina masa tirore ti ñabiaro yoapachuta cūno pjari jire tiro. Tíre wacūga mūsa, mūsa cūhū ñano yūhdūna, “Cūno pjaerari”, nina. Tíre wacūga mūsa “Tirore wacū tua duhuri”, nina. ⁴ Jesu to ñano yūhdūriro sehe ñaare yoerapanahta ñabiaro waro yūhdūerasinica mūsa. Ñaina mūsare wajāerasinica. ⁵ ¿Cohamacu mūsare to pohñare to yahurire bonocajari mūsa? Mūsa ñano yūhdūhtire to yahurire wacūga mūsa. Ō sehe nia tiri jire tiro:

“Yū macū, mūhure yū yahuchū yūhure ā ñūnocai tjiga ñano yūhdūpaihta.

Mũhũre yũ tuhtichũ tũhocũ cahyai tjiga.

6 Jipihtina yũ cahĩinare yahuja.

Ã yoa jipihtina ‘Yũ pohna jira mũsa’,
yũ ni ñũinare yũhdũrũca dutieraja.

Ã jicũ ti yũhdũrũcachũ ñũcũ tinare buhiri dahreja”,
nia tiri jire Cohamacũ. 7 Ñano yũhdũna Cohamacũ yare
duhuena tjiga. Cohamacũ mũsare to pohñare buhero nina. Ti
pũcũsuma ti pohñare ã yahurucura. Ã yoa tinare buherucura.
Tó seheta yoara Cohamacũ cũhũ marine to pohñare.

8 Cohamacũ jipihtina to pohñare ã yahurucura. Ã jina mũsare
to yahuerachũ to pohña waro jierara mũsa. Pũcũsuma marieina
yoaro sehe jira mũsa to yahueraina. Ã jina “Sã Pũcũ waro jira”,
ni masierara mũsa Cohamacũre, mũsare to yahuerachũ. 9 Mari
pũcũsuma marine ti yahuchũ tũhona tinare ño payoja mari.
Mari pũcũsumare mari ño payoriro yũhdoro ño payoro cahmana
mari Pũcũre Cohamacũre to yahuchũ. Ã jina tirore yũhtiro
cahmana marine. Ã yũhtiina jina jipihtia dachoripe tiro mehne
jinahca. 10 Mahaa nũmũricã ahri yahpai mari jisnichũ mari
pũcũsuma marine yahua, buhiri dahrera. Ti mũ sũro ti masino
purocãta marine yahua, buhiri dahrera. Cohamacũ sehe marine
noano yahura. Ã jiro to masia mehne marine buhiri dahrera
marine noaina bũcũna dutiro. Ãta yoara tiro marine tiro yoaro
sehe noaina mari jihto sehe. 11 Marine to buhiri dahrechũ
wahcheraja mari. Wiho mari cahyaja. Ã cahyapanahca to ã
buhiri dahreri baharo noaina bũcũnahca mari. Ã jina soro
yoaro marieno noano jinahca.

Cohamacũ marine to dutiare mari yũhtierachũ cua nina marine

12 Ã jina wacũ tuaera cureina jipanahta Cohamacũre wacũ
tuaina jiga. Tirore duhuena tjiga. 13 Noano potori mahare
mũsa wahaboro seheta noano potocã yoaga mũsa. Mũsa ã
yoachũ ñũ cũa, paina Jesu yaina soro jiare yoasi. Mũsa noano
yoachũ ñũ cũa, noano wacũ tuaera cureina cũhũ wacũ tuaina
wahaahca.

14 Jipihtina masa mehne noano jiga, cahmacheno marieno.
Ã yoa ñano yoarucuena tjiga. Ñaa buhiri marieina dihta mari
pũhtoro Cristore ñũahca.

15 Noano yoaga mũsa. Cohamacũ mũsare to yoadohochũ
tirore noano yũhtiga. Ñaa diaa ti toaare ti dojomehñeno seheta
mũsa cũhũ Cristo yare duhuena tjiga, “Painare dojomehñeri”,

nina. **16** Ne numia mehne ñano yoaina jiena tjiga. Ñ yoa Cohamacu yare cahmaeraina jiena tjiga. Cohamacure cahmaerariro jia tiri jire Esaú cjiro. Tiro masa wahmino jia tiri jimare. Ñ jiro to pucuro to yariari baharo to pucuro yare cjuah tiro jisinia tiri jimare. Cohamacu to pucurore to ni cūri cūhure cjuah tiro jisinia tiri jimare. Ñ jiro jiro cū dacho cū wapaihta chūare cahmano, tí wapa mehne to bahuro sehere to wahmino yoaro taro cohtotaa tiri jire. **17** To ñ yoari baharo to dohse waharire masina mūsa. To pucuro tirore to wahtire tuaro cahmaa tiri jimare Esaú. To ñ cahmapachuta to bahurore to wahmino to yoari buhiri, baharo to cjuaborire waera tiri jire to pucuro Esaúre. Tíre yahco mehne to sinipachuta tirore waera tiri jire to pucuro.

18 Cohamacu to dutiare Moise cjirore to cūchū mari coyea Israe masa cjiri Cohamacu mehne jia tiri jire. Tina tiro mehne ti jiro sehetā mūsa sehe jierare. Ō sehe yoaa tiri jire tina sehe. Tūcupu Cohamacu mehne jia taa, sūa tiri jire. Tū sehe Sinaí wama tidū jira. Tūpu ti sūchū tuaro pichaca jūa tiri jire. Ñ jiro nahitiano, buiri, tuaro wihnono cūhū jia tiri jire tū tūcūi. **19** Tópū ti sūchū corneta bisiro coa taa tiri jire. Ñ yoa durucua bisiro coa taa tiri jire. To ñ durucua bisiro coa tachū tūhoa, masa cūno pjaeraa, “Ñ durucu namoeno tjijaro”, tuaro ni sinia tiri jire. **20** Cohamacu cuaro mehne ō sehe ni, dutia tiri jire tinare: “Jipihtina ahdu tūcūre pihainare tāa mehne doca wajāga tinare. Ahdure pihariro wahiquiro waro to jipachuta tiro cūhure tāa mehne doca wajāga tirore. O ñosadu mehne ñosa wajāga tirore”, nia tiri jire Cohamacu. To ñ nichū tūhoa to ñ ni dutiare cūno pjaera tiri jire tina. **21** Jipihtia tū tūcūi jiro to ñūrire ñū cuiro, ō sehe nia tiri jire Moise cjiro: “Cuicu teterei nija”, nia tiri jire tiro.

22 Tó sehetā Cohamacu mehne ti ji ducariro sehetā jierara mūsa sehe. Cohamacu mehne jina wahana, Siō wama tidupu mūano macadupu mūsa sūboro sehetā potota Cohamacu mehne durucure mūsa. Cohamacu catirore to ya macapu mūsa sūboro sehetā potota tiro mehne durucure mūsa. Tí maca pa maca wahma maca Jerusalē mūano macari maca jira. Tópure payu anjoa peri jira. **23** Tina Cohamacu mehne wahchea taa cahmachuina jira. Ñ jina mūsa sehe to ya maca macaina jina, tópu Cohamacu pohna ji mūhtaina mehne mūsa cahmachuboriro sehetā jira. Tina to pohna wamare to joa ōri pūi mūanoru ti

wamare to joa õina jira. Tiro Cohamacu sehe jipihtinare besehtiro jira. Tiro mehne macaina jira musa sehe. A jina paina noaina Cohamacu yaina mehne cahmachuina seheta jira musa cõhõ. Tinareta ñaa marieina jichu yo tuhsuri jire Cohamacu. 24 A jina Jesu mehne macaina jira musa sehe. Wahmanopu Moise cjirore to duti cõri cjirore cohtotaro “Musare yuhdõchu yoaihtja yuhõ”, ni cõa tiri jire Cohamacu marine. To a ni cõriro seheta yoariro jira Jesu. To dire cohã to yariaro mehne a marine yuhdõchu yoara. Abe cjiro to di cohãchu ñõno Cohamacu Abere wajãrirore buhiri dahrea tiri jire. Jesu sehe to dire cohã to yariariro mehne noano yuhdõja mari. A jiro Abe to di cohãri wiho warota jia tiri jire. Cristo sehe to di cohãri baharo noa yuhdõaro yoari jire Cohamacu marine. A jia to di cohãri wiho warota jierara.

25 A jina noano yoaga musa. Cohamacu yare musare yahurirore noano yuhtiina jiga. Panopu ahri yahpai jiro Moise cjiro Cohamacu yare to yahuchõ tuhoa, payõ tãre tuho duaera tiri jire. A ti tuhoerari buhirire buhiri dahrea tiri jire Cohamacu tinare. Cristo sehe muanopu jiro Cohamacu yare yahuriro jira. A jiro panopu macainare to buhiri dahreriro yuhdoro buhiri dahrerõca Cohamacu Cristore cahmaerainare. Cristo sehe muanopu jiro Cohamacu yare yahuriro jira.

26 Tã pjare Moise cjirore to dutiare to cõri pjare Cohamacu to durucuro mehne yahpa ñuhmichõ yoaa tiri jire. Mipõ sehere õ sehe ni yahuri jire tiro: “Ahri yahpa to ñuhmichõ cõ taha yoa namoihtja. Ahri yahpa dihtare ñuhmichõ yoasi yuhõ. Muanopu cõhõre ñuhmichõ yoaihtja”, ni yahuri jire tiro. 27 “Ahri yahpa to ñuhmichõ cõ taha yoa namoihtja”, nino jipihtiare to bajuamehnerire to cohãhtore masichõ yoaro niri jire. Pũhtoro Cohamacu to sũho jiropõre cohãhto basioerara. A jiro to bajuamehneri cjirore to cohãchu pũhtoro to sũho jiro dihta tjuarõca. 28 Pũhtoro to sũho jiropõ wahanahca mari. A jina pũhtoro to sũho jiropõre to cohãerachõ ñõna, Cohamacure “Noana”, nijihna mari. A jina tirore ñõ payoa mehne, cua pisaro mehne to yare yoajihna mari tirore wahchechõ yoana tana. 29 Pichaca jũno to cuaro to jiro seheta Cohamacu cuaro choro buhiri dahreriro jira.

Õ sehe Cohamacure wahchechu yoaga

13 ¹ Mûsa mehne macainare cahĩ duhuena tjiga. ² Masa mûsa masieraina ti jipachuta tinare mûsa wuhusepu noano mehne sãa ta dutiga. Paina ã yoaa, masierapahta anjoare ti wuhusepu sãa ta dutiri jire. ã jina ti yoaro seheta yoaga mûsa cũhũ.

³ Peresui jiinare pja ñũga. Mûsa sehe tina mehne peresui jiina mûsa jiboro seheta tinare pja ñũga. Paina ti ñano yoina cũhũre pja ñũga. Tina yoaro sehe mûsa cũhũ mûsa ñano yũhdũboro seheta tinare pja ñũga.

⁴ Wamomaca dũhteina jipiltina mûsa basi noano cahma ño payoga. Æ yoa paina mehne ñano yoaena tjiga. Jipiltina numia mehne ñano yoinare, mûa mehne ñano yoaa numia cũhũre buhiri dahrerohca Cohamacũ.

⁵ Niñerure cahĩina ne jiena tjiga. Õ sehe nia tiri jire Cohamacũ: “Mûsare ne cohãsi. Æ yoadohorucuihtja mûsare”, nia tiri jire tiro. Noho puro mûsa cjuaa mehne tó purota wahchega. Pjĩro cahma namoena tjiga. ⁶ Æ jina cuiro marieno õ sehe ni tũhotunahca mari:

“Mari pũthoro Cohamacũ marine yoadohoriro jira.
Ne cuisu mari.

Masa marine ti ñano yoahore cuisu mari”,
ni tũhotunahca mari.

⁷ Cohamacũ yare mûsare yahurinare mûsare dutirinare wacũga mûsa. Æ yoa noano ti jia tirire noano ti yoaa tirire wacũga. Æ wacũna, Cristore ti wacũ tuariro seheta yoaga mûsa cũhũ.

⁸ Jesucristo ne cohtotaerara. Panopũ, mipũ cũhũre, baharopũ cũhũre to jiriro seheta jirucurohca tiro. ⁹ Payũ buheare soro jia buheare tũhoena tjiga mûsa “Noa buheare sãpu cohãri”, nina. “Ahrire chũga. Ahrire chũena tjiga”, ni buhera cãina. Æ ni ti nia buheare mari yũhtichũ tí marine yoadohoerara. Æ jiro tó sehe jia buheare mari yoachũ wiho warota jira. Tí marine wacũ tuaina jichũ yoarera. Cohamacũ sehe marine pja ñũno wacũ tuaina jichũ yoara. Æ jina to ya tuaa mehne tirore wacũ tuaina jiga mûsa cũhũ.

¹⁰ Cristo mari ñaa buhirire yariari jire mari ñaare cohãno taro. Sacerdotea sehe õ sehe niina jira: “Wahiquina mari wajã jũ mũoina, mari waina mehne yũhdũnahca”, niina

jira sacerdotea. Ñ niina ti ñaa yoari buhirire cohãina ne ji masierara. Cristo to crusai to yariaro mehne yũhdũina ji masierara tina ã ni tuhoutuina. **11** Mari judio masa mari sacerdotea pũtoro Cohamacũ to jiri tahtia waropũ dire na sãano wajã sitea tiri jire, masa ti ñaa yoari buhirire cosawero taro. Ñ yoa to wajãriro wahiquiro to pjacũre tí maca dũhtũ cahapũ jũ cohãnocahna. **12** To yoariro seheta Jesu cũhũ maca dũhtũ cahapũ yariari jire, masa ti ñaa buhirire to di cohãno mehne cosawero taro. **13** Maca dũhtũ cahapũ to yariachũ ñña, ti ya buheare to cohãchũ ñña judio masa pũtoa tirore ñũ tuhtiri jire. Ñ jina mari cũhũ tiro mehne macaina jijihna. Mari ã jichũ ñña, masa mari cũhũre ñũ tuhtiahca. **14** Ahri yahrapũ mari ji dojoahti maca ne mariahna. Ñ jina mipũre mari baharopũ jihti macare cohtana nija mari. **15** Ñ jina Jesu to yoadohoro mehne Cohamacũ mehne durucuja mari. Ñ jina tirore noano sinijihna. Sacerdote wahiquirore jũ mũo, Cohamacũre to ño payoriro seheta Cohamacũre mari dũseri mehne noano durucu ño payojihna mari. “Cohamacũ tuariro jira”, ni ño payorucujihna. Mari ã nichũ tiro wahcherohca. **16** Mũsa mehne macainare noano yoaga. Ñ yoa tinare yoadohoga. Tíre boena t̃jiga. Mũsa ã noano yoana Cohamacũre ño payona nica mũsa. Ñ yoana tirore wahchechũ yoana nica.

17 Mũsa pũtoare noano yũhtiga. Ti dutiro seheta yoaga. Cohamacũ mũsare ñũ wihbo, buhe dutiro cũre tinare. To ã cũrina jia mũsare ã ñũ wihborucua nina “Cohamacũre yũhdũrcari”, nia. Ñ jina tinare noano yũhtiga mũsa. Mũsa ã yũhtichũ ñña wahchea mehne mũsare yoadohoahca tina. Mũsa yũhtierachũ ñña tina cahyaahca. Ñ yũhtierana noano jisi mũsa.

18 Sãre sini payorucuga Cohamacũre. Dachoripe noaa dihtare yoa duaja sã. Ñ jina “Ñaare yoana nija”, ni tuhoutueraja sã. **19** Ahri pinihtare tuaro sini payoga Cohamacũre yũhũre: Soaro mehne mũsa cahapũ yũ wahahtore tirore sini payoga.

Ahri pũre joariro noa duti batoaha

20 Cohamacũ mari pũtoro Jesure yariarirore masori jire. Marine noano jichũ yoariro jira. Tiro “Mũsare yũhdũchũ yoaihtja”, ni cũa tiri jire Cohamacũ marine. To ã ni cũrire yoariro marine yũhdũchũ yoariro Jesu sehe jira. Mari ñaa buhirire yariari jire tiro. Ñ jiro tiro tuariro ovejare ñũ wihboriro

yoaro sehe jiro, marine to yainare noano ñu wihbora. ²¹ Ñ jiro Cohamacu tirore masoriro musa cūhure yoadohojaro jipihtia noaare to cahmaare musa yoahito sehe. Ñ jiro Jesucristo to yoadohoro mehne Cohamacu to cahmano seheta jipihtinare marine noaa sehere cohtotachu yoajaro. Jipihtia dachoripe Cristore ño payojihna. Ñta yoajihna.

²² Yu coyea, ahrire tuaro musare dutiichtja: Ahri pui yu yahurire noano mehne tuhoga musa. Ahri musare yu joarocari pu pjiri tju jierara. Ñ jina ahrire noano tuhoga. ²³ Ahri cūhure musare yahuihtja: Mari coyeirore Timoteore peresu jirirore wioyuhti. Soaro mehne to wihichu musare ñu wahacu tirore naaihtja. Yuhu mehne waharohca.

²⁴ Musa puhtoare, jipihtina painare Cohamacu yainare toi jiinare noa dutija. Italia macaina Jesu yaina cūhu musare noa dutira.

²⁵ Cohamacu to cahña mehne musare jipihtinare noano yoajaro.